

周  
官  
恒  
解

周官恆解卷三

春官宗伯序官

雙流劉沅輯註

惟王建國辨方正位體國經野設官分職以爲民極乃立春官宗伯使帥其屬而掌邦禮以佐王和邦國

人心天理之良不能自達則鬱而不暢禮者因人性而爲之節文使暢其天機如春之和煦萬物故爲春官宗主也尊也伯長也舜命伯夷典三禮名曰秩宗周因之立春官宗伯莫尊於禮故曰宗特主其事亦曰宗和邦國事得其序情得其順則和也

禮官之屬大宗伯卿一人小宗伯中大夫二人肆師下大夫四人上士八人中士十有六人旅下士三十有二人府

六人史十有二人胥十有二人徒百有二十人

鄭康成曰肆陳也肆師佐宗伯陳列祭祀之品物

鬱人下士二人府二人史一人徒八人鬯人下士二人府

一人史一人徒八人鬯於物反

鬱鬱金香草鬯釀秬黍爲酒秬亦名秠一稗二米以鬱金和鬯取其香氣周人尚臭祭先求諸陰故以鬱鬯灌地降神有鬱鬯有秬鬯秬鬯無鬱用於天地社稷等祀以明神不必香氣而達也鬱鬯專用之於宗廟

雞人下士一人史一人徒四人

賈氏公彥曰雞屬木在春其職共雞牲又主呼旦故列職於此

司尊彝下士二人府四人史二人胥二人徒二十人司几

筵下士二人府二人史一人徒八人

尊彝皆酒器但其所陳之地不同鄭康成曰筵亦席也鋪陳曰筵藉之曰席單言之則筵席通凡所以優尊者憑之以爲安也

天府上士一人中士二人府四人史二人胥二人徒二十人

物所藏曰府以其職藏寶器尊之若天物然

典瑞中士二人府二人史二人胥一人徒十人  
二人府二人史二人胥一人徒十人

鄭康成曰瑞節信也典瑞若今之符璽節命謂王遷秩羣臣之書瑞以事神頒器賜予皆恩惠事故屬春官

司服中士二人府二人史一人胥一人徒十人典祀中士

二人下士四人府二人史二人胥四人徒四十人守祧奄

八人女祧每廟二人奚四人

祧天堯反

司服再命以上得命卽得服故列於典命下典祀其職見下守祧守廟祧者言祧則廟可知疑凡先人之遺器衣服蓋亦藏於此而女奄則掌先后之遺者

世婦每宮卿二人下大夫四人中士八人女府二人女史

二人奚十有六人

世婦后宮官王后六宮每宮卿二人則十二人以婦之有德者爲之御案此官非另設卿二人卽以三夫人九嬪爲之下大夫四人以世婦爲之中士八人則女御爲之后之尊擬王自夫人嬪婦而下其爵視卿大夫士

平居則統於天官而從其本稱有喪祭之事則總於春官而被以卿大夫士之爵所以重禮事也卿所以十二人婦人恆有所避兩人僅得一人之用雖倍之而不嫌於過女府女史蓋以女官之有才知者爲之

### 內宗凡內女之有爵者外宗凡外女之有爵者

鄭康成曰內女王同姓之女有爵嫁於大夫及士者御案外宗王族人之婦以其異姓之女故稱外此中可兼姑姊妹之女若姑姊妹之女不嫁於王族則不得稱外宗陳氏傳良曰女子生於王族或乘勢以陵其夫家故以內外宗列爲禮官之屬使觀王后之事宗廟則知所以順舅姑觀后之享同姓則知所以和其家人

冢人下大夫二人中士四人府二人史四人胥十有二人徒百有二十人墓大夫下大夫二人中士八人府二人史四人胥二十人徒二百人

山頂曰冢封土爲邱龍象冢故曰冢墓則葬而其土仍平行也二者亦禮事故列職於此

職喪上士二人中士四人下士八人府二人史四人胥四人徒四十人

職主也孝子荒迷中恐弗能如禮故設官相之先王之體羣臣至矣

大司樂中大夫二人樂師下大夫四人上士八人下士十有六人府四人史八人胥八人徒八十人

大司樂樂官之長禮樂相須而行古人初學卽學樂誦詩舞勺舞象至於教胥皆必以樂蓋所以養其心之和平而蕩滌其邪妄故孔子曰興於詩成於樂也虎門之教主於于世子故師氏一人其成均則國子弟貴遊子弟大夫元士之適子國之俊選諸侯之賢士皆與焉故大司樂二人乃能共襄其事其人必德行優而可爲矜

者武

大胥中士四人小胥下士八人府二人史四人徒四十人

胥有才智之爲大胥掌敘次所學之事小胥掌其徵令其事相成故皆別職同官而府史胥徒共之凡五官之司旅職業相聯者皆然所以便事而省役也

大師下大夫二人小師上士四人瞽矇上瞽四十人中瞽

百人下瞽百有六十人眡瞭三百人

大音泰又如字矇音蒙眡音視瞭音了

鄭氏眾曰無目眡曰瞽有目眡而無見曰矇有目無眸子曰矇凡樂歌必以瞽矇爲之大師小師皆其人也其用心專其德性厚乃能審音知微以通天地之妙故古者師多賢人矇目明也以相瞽者

典同中士二人府一人史一人胥二人徒二十人



同陰律也舉陰以該陽

磬師中士四人下士八人府四人史二人胥四人徒四十人  
鍾師中士四人下士八人府二人史二人胥六人徒六十人  
笙師中士二人下士四人府二人史二人胥一人徒十人

磬師鍾師皆專職一業磬鍾之屬不一也笙師掌教吹  
竽笙塤箛簫簴篪遂管春牘應雅而獨以笙名師笙東方  
之樂有始事之義故也

鐃師中士二人下士四人府二人史二人胥二人徒二十

人  
鐃音博儀禮大射篇作鐃同

鈎如鍾而小特懸者  
蓋今之小形鍾也

鞀師下士二人府一人史一人舞者十有六人徒四十人

鞀莫拜反亦音妹音味

掌四夷之樂蓋四夷各有樂雖非中聲然皆人心之天籟故設鞀師掌之以節其淫而歸於正

旄人下士四人舞者眾寡無數府一人史二人胥二人徒二十人

旄旄牛尾舞者所持以指揮其職凡四方之以舞仕者屬焉則凡四夷之舞皆隸矣

籥師中士四人府二人史二人胥二人徒二十人籥章中士二人下士四人府一人史一人胥二人徒二十人

簫如笛三孔而短小舞者吹以節樂亦有六孔者則吹詩章故簫師掌其事而簫章助其教

鞀鞀氏下士四人府一人史一人胥二人徒二十人鞀丁今反

鞀九具反又力具反

鞀鞀無絢之屏也四夷着之以舞因取以名功掌夷舞也

典庸器下士四人府四人史二人胥八人徒八十人

庸功也有功者饗器以銘其功祭則陳之示不忘之義

司干下士二人府二人史二人徒二十人

干楫也舞者所持呂東萊謂干舞武舞之別名簫舞文舞之別名萬二舞之總名然舞必有干特其節不同耳未可強分

大卜下大夫二人卜師上士四人卜人中士八人下士十  
有六人府二人史二人胥四人徒四十人

大卜卜筮官之長卜筮皆假龜著以求神非至誠明察者莫能決其機

龜人中士二人府二人史二人工四人胥四人徒四十人

華氏下士二人史一人徒八人

華時  
隨反

鄭康成曰工取龜攻龜燂燂用荆蕒之類取龜攻龜見下蕒所以播筭人用荆灼龜亦用荆因取以名之

占人下士八人府一人史二人徒八人

御案別立占人以卜師筮人致其誠壹心不可分用愚按占人亦或即用卜師筮人兼之

簪人中士二人府一人史二人徒四人

簪與  
筮同

以耆占易其事較龜卜爲簡故其人亦寡

占夢中士二人史二人徒四人

人心之靈與造化通平日修德勵行敬畏天命則夢或感之以呈其兆否則入於妖妄故聖人設官以重其事

眠祲中士二人史二人徒四人

祲子鵠反

鄭康成曰祲陰陽氣相侵漸成祲者日爲陽精人君之象陰氣侵則不祥聖人不言祥瑞而觀天之變以自警省乃體天修德之要故立眠祲

大祝下大夫二人上士四人小祝中士八人下士十有六人府二人史四人胥四人徒四十人

大祝凡祝官之長小祝佐之祝爲祝詞以告鬼神述祭者之誠意

喪祝上七二人中士四人下士八人府二人史二人胥四人徒四十人甸祝下士二人府一人史一人徒四人詛祝下士二人府一人史一人徒四人

詛側慮反

御案其職事不止於祝而以祝名不止於喪而以喪名從所重也鄭康成曰甸之言田也田狩之祝詛祝之沮敗也蓋民心天理之良不能盡泯往往敢於欺人而不敢欺神且古無刑書律例其有是非難明者使盟詛以自白審其情形亦可以得其是非而天良不昧或有憬然悟者此聖人仁恕於民之意也御案呂刑以覆詛盟為有苗罪則隆古已有其事小雅出此三物以詛爾斯蓋理法情勢之窮有不得不言於鬼神者世儒或疑之誤矣

司巫中士二人府一人史一人胥一人徒十人男巫無數

女巫無數其師中士四人府二人史四人胥四人徒四十人

司巫巫官之長天人一氣幽明一理也人心一動而鬼神知之其在人君爲人神之主尤有一息不敢苟者楚語曰古者民之精爽不攜貳者神明降之在男曰巫在女亦曰巫蓋天命之理無一息不流行於天壤間卽鬼神之靈無一息不周於人物內設司巫以統之男女巫皆無數非濫也無誠明之念者神不降之數本難限也大史下大夫二人上士四人小史中士八人下士十有六人府四人史八人胥四人徒四十人

大史史官之長主稽天道而藏書辨法其職重其人必有德故下大夫而位從卿小史與大史別職同官攷其史府

馮相氏中士二人下士四人府二人史四人徒八人保章

氏中士二人下士四人府二人史四人徒八人

馮音憑相去聲

鄒康成曰馮乘也祖視也世登高臺以視天文之次序係守也世守天文之變恩授鄧云世者以其言氏也竊謂大史位尊德重不必常親視天文及親占之馮相係章則親其事者馮相以其短登臺而相名之係章占其變以章明天道告王知警保安社稷而名天文之學世業者多精故以氏名耳

內史中大夫一人下大夫二人上士四人中士八人下士十有六人府四人史八人胥四人徒四十人外史上士四人中士八人下士十有六人胥二人徒二十人

內史掌八柄之灋詔王行於冢宰地親任重故爵秩高而置官廣外史在外廣王耳目而通壅蔽魏氏校曰內史官互降



史王之喉舌唐虞納言漢尚書魏晉中書門下其始亦  
內史職後遂建爲三省宰相二官名實俱亂人主疎遠  
輔臣退與左右議政號曰內相未幾宦官多竊內史之  
柄以亂天下按黜陟予奪者人主之大權而非講求參  
酌歸於至是則無以詔人宰而施之內外史掌入柄之  
遽而廢其採納其官隸於宗伯得以共參定之不特大  
宰不能行其私天子亦集眾論而得其平御案內史  
中下大夫外史無大夫直自上士始而又無府史蓋二  
職同官而統於內史也

御史中士八人下士十有六人其史百有二十人府四人  
胥四人徒四十人

鄭康成曰御猶侍也進也按此卽左史記言右史記事  
者記王之言動以示懲警蓋上於大史焉後世以御史  
專主諫諍因記言動之意而廣之也君有過則諫諫而  
改之則不書矣至於糾察一切之事皆許陳言亦無不

可但必不  
否則藉以  
傾人淆亂是非如明季可鑒也

巾車下大夫二人上士四人中士八人下士十有六人府  
四人史八人工百人胥五人徒五十人

巾猶衣也王金象革等以衣飾其車巾車車官之長  
御案造車者輪輿輶等入當屬冬官此有工百人者玉  
象金革漆飾及蔽莠等  
事皆巾車之工爲之

典路中士二人下士四人府二人史二人胥二人徒二十  
人

路王所乘車路大也典  
路掌王及后之車事

車僕中士二人下士四人府二人史二人胥二人徒二十

人

車僕掌五戎之萃蓋天子之車卽戎事亦必有禮儀作則故與巾車相聯而列春官

司常中士二人下士四人府二人史二人胥四人徒四十

人

鄭康成曰司常主王旌旗大常九旂之一舉以該凡旌杜氏佑曰黃帝兵制設五旗五麾夏奚仲爲車正建其旂旐殷因之周設司常掌九旗

都宗人上士二人中士四人府二人史四人胥四人徒四十人  
家宗人如都宗人之數

都王子弟所封及公卿所食邑宗人其禮官也家大夫所食采邑

凡以神士者無數以其藝爲之貴賤之等

士仕通

以神仕者謂巫之屬蓋幽明雖止一理而境則懸殊聖人既欲人知神道不外乎人亦欲人知道不先於神巫之徒其才知絕人如國語所稱者則貴之其次者則賤之要以其能通人神而警民志故不盡授以職亦不以數拘限

周官恆解卷三

春官宗伯

雙流劉沅輯註

大宗伯之職掌建邦之天神人鬼地元之禮以佐王建保邦國

元同祇下神元地元皆倣此

鄭康成曰建立也立天神地元人鬼之禮謂祭之祀之享之吉禮是也保安也賈氏公彥曰單言邦據王邦國則統侯國言之按五禮而獨以天神地元人鬼言者王者代天理物必體天地之心以行天地之道平日仁義周於民物出以至誠至敬則天地乃享之天地無言無爲神祇者司天地之功用地也人鬼則己之祖先以及先代賢聖民之祖考非實體天地之德者必見棄於其先與眾靈故特以三者明禮之大而曰佐王建保邦國

三

—

100

天左旋五星爲經右旋日月所會十二次燹燎積柴而實牲體於上燹之使燹上升三台星一名天柱上台司中中台司命下台司祿人受氣於父母實受氣於天地天地之精散爲萬物而人最靈其受中以生得天地大極之理而爲性司中者此也所受以生謂之命司命者此也其司祿不言者祿由人致較中與命之天定自然者有別祀此使人知受氣成形之不偶然而事天立命以全其性也飄雨節宣陰陽之氣而生成萬物亦有司之者前人執言箕畢非也不言雷該於風雨中矣

以血祭祭社稷五祀五嶽以貍沈祭山林川澤以鬴辜祭

四方百物狸牟皆反亦音莫蔭反

天陽也故天神柴燎以氣達地陰也故地元血質以形求不言祭地者地統於天天包平地天地非二物也上文禮祀已該地在內然天以一氣育萬物而成之者地也地形殊而品物因之以殊故天一而已地則各有土

宜因之司其地者亦不一此五祀五嶽山林川澤各有其元四方百物各有其氣也血陰氣之盛者社稷之神古以句龍爲社神稷神先祀社後祀稷特中原一區先有功德於民者四海內外不盡此也五祀之說不一疑天子諸侯則祀金木水火土五官之神而大夫以下則祀戶龍門行中雷爲是五嶽東岱宗南衡山西華山北恆山中嵩山也山林則埋牲川澤則泚牲順其性也竊辜磔也坡磔牲體四方百物賈疏以祀先嗇貓虎等當之然四方之神不一其爲民害之物亦不一凡物之害民者必祈神以治之則經意自渾括而曲盡蜡祭所云亦其一耳

以肆獻裸享先王以饋食享先王以祠春享先王以禴夏享先王以嘗秋享先王以烝冬享先王

肆如字食音嗣禴餘若反祠當爲酌

禴當爲禘



肆大也陳也獻獻脾灌用饔鬯灌地以求神祭禮莫重  
於禋獻此舉以該隆備禮之大祭也饋食獻黍稷舉以  
該殺禮之祭也四時之祭或用隆備禮或用殺禮此二  
句統下四句而言非祭之正名也四時之祭春日祈夏  
日禘秋曰嘗冬日烝祈禴同春時物初生其祭較薄禘  
帝也帝德王於夏嘗物初成薦新烝盛也冬百物備合  
之以享也此言祠春禴夏烝傳寫之誤抑或漢儒所改  
蓋禘祭先儒多不得其解故也四時之祭夏曰禘時禘  
也五年合羣廟之主以祭太祖大禘也大  
禘卽裕愚於論語或問禘章已詳茲不贅

以凶禮哀邦國之憂以喪禮哀死亡以荒禮哀凶札以弔

禮哀禍哉以禴禮哀圍敗以恤禮哀寇亂

札如字一音截  
禴戶外反又古

外反

凶禮卽下死亡五者是也人有此則憂先王哀之而制  
禮以同其憂始死曰死既葬爲亡焉喪禮以達其哀戚

荒饑饉札疫癘荒禮以濟其窮苦禍人禍哉天災水火之類弔禮以慰其失意給會也合財物以贈人圍被圍困敗師敗績恤憂也兵作於外爲寇作於內爲亂寇亂之興必有其由咎不盡在人亦不盡在己故恤之而已其權宜子奪必有道矣以上五者自天子以至庶人皆有共禮特自上倡之耳

以質禮親邦國春見曰朝夏見曰宗秋見曰覲冬見曰遇

時見曰會殷見曰同時聘曰問殷嬪曰視見賢遍反朝直

親謂使之相親附也諸侯五年一朝無事自當早至而或國有大事其至稍遲故有四時之不同朝猶朝也言其來之早也宗尊也言其尊王來正當其時也覲見也言其有故遲至以得見爲幸也過不期而遇言其國有大故已不意其來而忽來如非所期也四者皆朝之常禮時見諸侯有要事親聚命於王不時來見殷見諸侯同見於王時聘不時遣使問王起居小聘大夫大聘使卿殷見王室有故慶弔皆使人來也

以軍禮同邦國大師之禮用眾也大均之禮恤眾也大田之禮簡眾也大役之禮任眾也大封之禮合眾也

鄭康成曰同謂威其不協僭差者大師或王親行或命將出征用眾得其心得其力然後能用之也大均以地出賦以民任事必量其地之美惡家之上下以體恤之大田四時田獵講武因以知其賢否勇怯而簡取之大役建都邑築城濬川使之以時用之以禮眾任其事而不怨大封或封建國邑或封以爵命賞當其功眾志悅服而和合

以嘉禮親萬民以飲食之禮親宗族兄弟以昏冠之禮親成男女以賓射之禮親故舊朋友以饗燕之禮親四方之賓客以脩膳之禮親兄弟之國以賀慶之禮親異姓之國

冠古亂反服上

忍反膳音煩

嘉善也秉彝之良本有相親附之善心無禮則疏悖故制嘉禮天子至尊宗族兄弟易於疏遠故制為飲食之禮以親之男女怨曠則不親無禮則淫亂故以昏冠之禮成其男女成者男正位乎外女正位乎內有相資無相續也故舊或老臣或故交朋友相習為道藝者時以賓禮待之與之射以親之四方賓客來朝聘者饗於廟燕於寢禮有隆殺無非所以親之服祭社稷之肉膳祭宗廟之肉以賜兄弟之國同其福祿其異姓亦或賜之蓋殊禮非常制也賀慶則弔問可知異姓猶賀慶則同姓可知此二句互義特各以其重言之

以九儀之命正邦國之位一命受職再命受服三命受位四命受器五命賜則六命賜官七命賜國八命作牧九命作伯

命王命命有九儀亦有九貴處之位乃正春秋傳所謂  
名位不同禮亦異數也受職受命於王他有職者不得  
與受服受元冕之服御案一命亦有服而必元冕乃  
得言受服猶子男亦有卿而必王朝孤卿立兩卿始得  
言受官也受位鄭康成曰列國之卿始有列位於王為  
王之臣王之上士亦三命受器公之孤始得具祭器則  
法也治國之法則其人雖未成國而已有屬邑若干則  
賜以法擬於諸侯賜使得自置其官治家邑賜國則侯  
伯矣其子男止五命牧侯伯有功德者加命得專征伐  
牧治也代天子治人伯長也上公有功德者加命為二  
伯統馭諸侯

以玉作六瑞以等邦國王執鎮圭公執桓圭侯執信圭伯

執躬圭子執穀璧男執蒲璧信音身

鄭康成曰等猶齊也鎮安也所以安四方長尺有二十  
蓋取四鎮之山為瑑飾桓柱之豎者官室得桓柱乃安

天子得上公亦安以桓爲飾長九寸信躬皆象人形以爲飾信象人身之信躬象人身之屈長七寸穀所以養人蒲爲席以安人圭以二者爲飾皆徑五寸不執圭者未成國也

以禽作六摯以等諸臣孤執皮帛卿執羔大夫執鴈士執

雉庶人執鷩工商執雞

鷩音木

摯之言至也執物以至明非無因而來自卿以下皆禽故以其多者言之帛束帛皮獸皮羔小羊取其能羣鴈陽鳥知時無則以舒鴈代之雉取其文明鷩不飛遷雞知時古庶人工商亦有見於天子之時蓋人品不以資格限也其自相見亦同此摯

以玉作六器以禮天地四方以蒼璧禮天以黃琮禮地以青圭禮東方以赤璋禮南方以白琥禮西方以玄璜禮北

方皆有牲幣各放其器之色

琥才宗反璋音章琥音虎璜音黃放方往反

作方器作為六者之形器執之以致其敬禮璧圓象天  
蒼象其色琮方象地黃象其色圭銳象出震半圭曰璋  
象陽氣半伏於地天琥為虎形象秋氣之猛半璧曰璜象  
陽氣半伏於地其色則各如其方之色也牲幣亦然或  
疑陰陽遞運成一歲功何獨以陽氣言之不知陰統於  
陽夏至陽盡而陰生冬至陰極而陽生故惟夏冬用半  
圭半璧圭銳陽升之象璧圓亦象天其半則天地閉藏之意耳

以天產作陰德以中禮防之以地產作陽德以和樂防之  
以禮樂合天地之化百物之產以事鬼神以諧萬民以致

百物

此承上而通論禮樂之事所以能事神人而和上下也  
天以一元生化而屈伸消長則為陰陽陰陽相濟而得

其中和天地之所以萬古而不息也人爲天地之心實秉中和之德特陰陽之氣偏勝則弗肖天地聖人制禮樂以導中和卽名物象數皆法陰陽調燮之意而爲之天產凡得陽氣甚之物陰不自生待陽而生用天產實所以助陰德也地產凡得陰氣甚之物陽不能成藉陰而成用地產實所以助陽德也鬼神陰陽之靈萬民備陰陽之理百物分陰陽之氣禮以節之樂以和之而可以事可以諧可以致矣防者節其太過不及如水之有防也

凡祀大神享大鬼祭大元帥執事而卜曰宿眡滌濯蒞玉

鬯省牲饗奉玉齎詔大號治其大禮詔相王之大禮滌徒

饗戶郭反齎音

皆相息亮反

宿祭前一宿滌濯概祭器蒞臨視也玉禮神之玉始蒞之祭又奉之饗享牲之器大號六號之大者以詔大祝



預爲祝辭治簡習也豫簡習至祭時以詔相王詔未祭時告之相及行禮時相之

若王不與祭祀則攝位凡大祭祀王后不與則攝而薦豆

遵徹大賓客則攝而載果

與音預果音裸

王不與祭祀居憂或有疾也王后不與亦然冢宰亦有故不得攝則宗伯攝之果酌酒以禮賓也

朝覲會同則爲上相大喪亦如之王哭諸侯亦如之王命

諸侯則僨國有大故則旅上帝及四望王大封則先告后

土乃頒祀于邦國都家鄉邑

和息亮反僨必刃反

相贊禮者出迎賓曰僨入詔禮曰柏哭諸侯薨於其國天子爲位而哭之命策命之僨進也大故凶裁旅陳也陳其情事以祈禮或不如平日之備四望五嶽四瀆大封封諸侯授采邑者爲小封將錫以土故先告后土凡

有土之屬皆有宜  
祀者故頒其禮

小宗伯之職掌建國之神位右社稷左宗廟兆五帝于四郊四望四類亦如之兆山川丘陵墳衍各因其方

小宗伯宗伯之副神位會諸神而言地道尙右故建社稷人道尙左故建宗廟五帝青黃赤白黑帝古或以人配之實不必然也黃帝與火同方中央土王於夏也兆爲壇之營域四望五嶽四鎮四瀆四類四方之神有與四望類者亦於四郊爲之兆至國之中所有山川丘陵墳衍各因其所在之方而爲之兆使民祭之鄭氏以四類爲日月星辰風師雨師四字不明但日月星辰風雨皆天之功用當從祀昊天上帝不得別爲兆域兆山川句以爲同在郊外爲位亦誤

掌五禮之禁令與其用等辨廟祧之昭穆辨吉凶之五服

車旗官室之禁掌三族之別以辨親疏其正室皆謂之門  
子掌其政令

五禮吉凶軍賓嘉用等牲器尊卑之等不當用者禁之  
得用者令之祧藏遷主之廟周公制禮以文王有穆穆  
之德武王有昭昭之功稱為昭考穆考因制為宗廟之  
禮父為穆則子為昭父為昭則子為穆上推祖考下及  
子孫有序而不紊異位而同安故孔子稱之曰宗廟之  
禮所以序昭穆也天子七廟諸侯五廟大夫三廟盈其  
數則遷其最上之主而別為廟以位之亦以昭穆為別  
至五年祫食則遷廟之主亦得同享於太祖之廟此周  
公達乎天理人情之極而為之恐日久或有淆忘小宗  
伯時辨之耳吉服有五以吉凶該其大概車旗官室亦  
齊其大小功總麻也五而以吉凶該其大概車旗官室亦  
舉其大以該凡為器數禁不得上僭下倨也三族父族  
母族妻族也舊以父子孫為三族不知父子子孫服有  
隆殺誼原一本皆親也母族妻族後人徒見外戚事貴

力爲擯斥然因父而及父族因母而及母族因重夫婦之禮而及妻族其誼相屬其族則疏若止父子及孫則一族而已何云三族又何云辨親疏耶正室主家者也親族別而禮有隆殺皆令門子掌其政令以施之於其族此可見母妻之族雖同列於三族而禮別親疏不相絕亦不相干也胡爲不達聖人之意而妄疑乎

毛六牲辨其名物而頒之于五官使其奉之辨六齎之名物與其用使六官之人共奉之辨六彝之名物以待祭祀賓客

毛擇毛也名六牲皆有名物色也色異而用亦異若宗廟用駢之等天官不奉牲故云五官牧人已毛之矣此乃祭時將用之又毛之而頒之助王率入廟盥讀爲棗卽六穀稻粱菽麥黍稷也六官之人若世婦掌女宮之宿戒者六彝虎彝鳥彝犀彝黃彝雞彝雉彝果讀爲裸易氏被曰六彝用於裸實以鬱齊六尊用於獻實以五

齊三酒小宗伯辨其名物以待用然後司尊彝詔其酌辨其用與其實言賓客者在廟饗賓客亦依祭禮惟在野外饗不用祭禮之尊故春秋傳云犧象不出門也

掌衣服車旗官室之賞賜掌四時祭祀之序事與其禮若

國大貞則奉玉帛以詔號

賞賜有功者所謂車服以庸也衣服若司裘袞冕以下車旗若巾車金路以下序事卜日省牲視滌濯饗饗以下事其事有先後之序其禮有隆殺之別大貞卜立君卜大封也號神號幣號

大祭祀省牲眡滌濯祭之日逆齋省鑊告時于王告備于

王凡祭祀賓客以時將瓚裸詔相祭祀之小禮凡大禮佐

大宗伯

瓚才但反相息亮反

充人繫牲執事者滌濯祭器饌人共粢盛亨人亨牲至  
祭祀之時佐大宗伯省之眡之逆之皆以告于王其專  
職也時薦陳之早晚備備具將送也猶奉也賓客以時  
奉而授大宗伯祭祀或后不與而大宗伯攝則亦將之  
以授大宗伯若授王則小宰贊之無所用小宗伯矣大  
宗伯詔相大禮小宗伯詔相小禮賈氏公彥曰言此者  
以下皆小宗伯專行事不  
佐大宗伯故言之以緒上

賜卿大夫士爵則儉小祭祀掌事如大宗伯之禮大賓客  
受其將幣之齋若大師則帥有司而立軍社奉主車若軍  
將有事則與祭有司將事于四望若大甸則帥有司而饁  
獸于郊遂頒禽大裁及執事禱祠于上下神元與音預齋

音出饁  
于輒反

賜猶命也。領之如命。諸侯之儀。小祭祀。王元冕。所祭事。若大宗伯帥執事而卜。日以至。詔大號之。類。齋所齋來。百獻之財。物以禮官掌之。則非禮者不得入矣。大師王親行。征伐軍行。載社主。遷廟之主。以行言立。則非社之社主與廟主而別。爲主蓋有虛位。無實主也。與祭卽祭。社主廟主其四望。則有司將事。己不與也。蓋軍所至處。必望祭其地。之山川大甸。王親田也。饁饋也。以禽饋四方之神於郊。頒禽以予羣臣。以禮官與軍事田事者皆不可以無禮也。大宗伯不行。故小宗伯專之也。大蕡水火旱癘執事專司其事者求福曰禱。得求曰祠。上下神元靡神不舉也。

王崩大肆以秬鬯。酒及執事泣大斂。小斂。帥異族而佐。縣衰冠之式于路門之外。及執事。祔葬。獻器。遂哭之。卜葬兆甫。襄亦如之。旣葬。詔相喪祭之禮。成葬而祭。墓爲位。

明  
婢反

縣音懸衰七雷反窳昌絹

反昌銳反又音穿相去聲

大肆大浴也汧以拒鬯浴尸執事太祝之屬小斂衣十

九稱大斂衣百稱異族不必公族也佐助斂也衰冠精

粗貴賤各有式法懸之俾百族皆以爲準執事蓋梓匠

之屬將葬獻明器之材哭啟殯陳行器王哭而小宗伯

帥其當哭者亦哭也兆墓塋域甫始也窳謂穿墳亦如

之亦哭也既葬而虞祭爲喪祭明日耐於祖父其禮皆

詔相之蓋未葬以前不忍異於生故無尸而設奠象生

時之薦羞也既葬而虞以安神男男尸女女尸以神事

之對未葬言則虞爲吉祭對卒哭言則虞仍葬祭

也成葬邱已封也位壇位祭后土之神以安祐之

凡王之會同軍旅旬役之禱祠肄儀爲位國有禍裁則亦

如之凡天地之大裁類社稷宗廟則爲位凡國之大禮佐

大宗伯凡小禮掌事如大宗伯之儀

甸音田肄以志反



禱祠所呵設於神肆習也禍涉水火凶荒瘡札大裁日  
月食星隕地震山崩水  
經言大禮小禮祭祀之  
也此則總五禮之大小  
禮

肆師之職掌立國祀之禮以佐大宗伯立大祀用玉帛牲  
牲立次祀用牲幣立小祀用牲

肆陳也陳列祭祀之禮者別言之則天神地祇人鬼曰  
祀曰享曰祭合言之通謂之祀大小祀自天地嶽瀆社  
稷宗廟以次而差幣帛一也自  
其質言曰帛制而用之曰幣

以歲時序其祭祀及其所珥大祭祀展犧牲繫于牢頒于  
職人凡祭祀之卜日宿爲期詔相其禮眡滌濯亦如之祭  
之日表齋盛告絜展器陳告備及果築鬻相治小禮誅其

怠慢者掌兆中廟中之禁令凡祭祀禮成則告事畢

祈如字耳

而志反相去聲

果音裸齊同煮

序次其先後始以其時祭之祈祈福耳同耳將封割牲  
先取耳旁毛以繫求神欲其聽也祈耳凡當祈神耳  
之事展省視也繫于牢使充人芻之職人五官及其屬  
宿先卜祭之夕詔相告助其卜之威儀及齋戒之禮表  
徽識也盛黍稷有蓋覆之不知其實故須表顯之蓋六  
穀在器曰盛陳陳列及禋時築馨築者杵鬱金以發其  
香鬱煮秬鬯以發其味蓋察視鬱人之如法否也相治  
小禮佐小宗伯也掌禁令兼平時臨事告事畢與告潔  
告備相終始也

大賓客蒞筵几築馨贊果將大朝覲佐饗共設匪饗之禮

饗食授祭與祝侯禋于畚及郊

藝於貢反食音嗣匪作饗畚同疆

大賓客諸侯來朝者並筵几司几筵設之肆師復臨視之築鬻所以爲禋將之用小宗伯職之而肆師贊之佐饗大宗伯朝覲會同爲上相肆師爲佐饗也饗所以實幣蕃所以實醢饗以酒飲賓食以食食賓授祭以物授賓使祭祝小祝司侯廟之事侯侯也迎其祥釐去其殃噩五百里其地有水旱厲疫乃侯禳之肆師必偕者重其事以急民病也

大喪大淵以鬯則築鬻令外內命婦序哭禁外內命男女

之哀不中灋者且授之杖

中知仲反

序哭以服之輕重爲先後也此外內命夫婦與天官屨人不同彼對王宮言則外命夫惟公卿大夫士此則該朝覲之諸侯言其妻爲外命女內命女王之三夫人以下不中灋違升數與裁制者

凡師甸用牲于社宗則爲位類造上帝封于大神祭兵于

山川亦如之凡師不功則助牽主車凡四時之大甸獵祭

表貉則爲位

何音田造七報反貉莫駕貉音陌

師田因師而田也社宗師中軍社主軍類造皆祭也聚其神而祭曰類至其所而祭曰造大神方嶽山川軍所依止不功軍敗也助牽主車以安神靈大甸獵以王命田或王親田也貉師祭也日禱於所立表之處祭之肆師爲之位

嘗之日涖卜來歲之芟獮之日涖卜來歲之戒社之日涖卜來歲之稼若國有大故則令國人祭歲時之祭祀亦如

之凡卿大夫之喪相其禮

芟色銜反獮思淺反相息亮反

嘗秋祭也以嘗新穀而名芟去草卜來歲之芟祈神相無萊蕪也獮秋田也秋時穀熟恐獸害稼故因而田卜

來歲之戒亦祈神相預戒其侵害也社祭土神卜來歲之稼祈年也大故水旱凶荒令國人祭社及禁酺歲時祭祀亦預戒之使無關喪禮並其禁令卿大夫士凡有爵者所同此相其禮則卿大夫之喪所以異於士者

凡國之大事治其禮儀以佐宗伯凡國之小事治其禮儀而掌其事如宗伯之禮

大宗伯小宗伯肆師所掌禮事以次相承禮之大者大宗伯掌或有故則小宗伯攝之禮之小者小宗伯掌之或有故則肆師攝之所以無廢事也

鬱人掌祼器凡祭祀賓客之祼事和鬱鬯以實彝而陳之凡祼玉濯之陳之以贊祼事詔祼將之儀與其節凡祼事

沃盥

裸器彝及舟瓊有司辨其用而饗人掌其器天地不祿山川及門社等止用鬯此所言祭祀惟宗廟耳祿玉謂圭璫瓊瓊節行事早晏之節沃盥王將裸而盥手饗人沃以水也

大喪之涓其肆器及葬其裸器遂貍之大祭祀與量

人受舉斚之卒爵而飲之

涓明婢反葬門皆反斚古雅反

肆器陳夷盤以浴尸也將葬遣奠之裸器共之而遂經之示不忍復用也大祭祀王醕尸尸嘏王其卒爵與受而飲之明饗人共鬯也神果受享而分其惠也

鬯人掌其秬鬯而飾之凡祭祀社壇用大鬯崇門用瓢齋

廟用脩凡山川四方用蜃凡祿事用概凡禴事用散大喪

之大河設斗其其數鬯凡王之齊事其其秬鬯凡王弔臨

其介鬯鬯音葵反鬯音雷音詠鬯音通反齋音資脩作由鬯音通反斗音主齊側皆反

秬黑黍也釀以為酒曰鬯不和鬱飾之設巾覆之遺瓊

外委土為之鬯瓦器取鬯畧之意崇祭水旱之名門國

門鬯齋日鬯去祗以齊為尊占中尊犧象之屬鬯書尊

為鬯形概黑漆木以為尊絡以朱帶無飾曰散斗所以

沃尸鬯鬯以鬯塗尸使之香美也齊事其秬鬯以給泮

浴亦使其香美王即臨諸臣至尊不自舉鬯介代之

辨人掌其雞牲辨其物大祭祀夜嘯旦以詔百官凡國之

大賓客會同軍旅喪紀亦如之凡國事為期則告之時凡

祭祀百禋豐共其雞牲嘯一作呼火吳反詔弔反禋如羊反

物毛色也辨之若陽祀用駢陰祀用黝之類夜雞鳴時

嘯旦以警起百官告之時如春朝朝日秋暮夕月之類

周官恆解

卷三

春官

函

面藏四面藏也數樂  
廟數鼓鼙甲兵之屬

司尊彝掌六尊六彝之位詔其酌辨其用與其實

位所陳之處若元酒在室醴醕在戶之類酌沛之使可酌用四時祭祀所用不同實鬱及醴齊之屬按尊尊也酒以成禮所以尊賓亦使飲者自尊也彝法也飲酒有法使不亂

春祠夏禴裸用雞彝鳥彝皆有卣其朝踐用兩獻尊其再獻用兩象尊皆有罍諸臣之所昨也秋嘗冬烝裸用毳彝黃彝皆有卣其朝獻用兩著尊其饋獻用兩壺尊皆有罍諸臣之所昨也凡四時之間祀追享朝享裸用虎彝雉彝皆有卣其朝踐用兩大尊其再獻用兩山尊皆有罍諸臣



之所昨也

獻作犧素朝音潮雌

何反昨作酢若直畧反音誅又以水反大音泰

雞鳥刻為雞與鳳形獻飾以翡翠象以象骨飾尊舟盛尊彝之器蓋為舟形故名器瓦尊存質之意畢讀為稼畫禾稼也黃彝黃目尊也記曰黃者中也目者氣之清明者也言酌於中而清明於外也著者地無足並以壺為尊間祀禘祫也以其間於四時之間故曰間祀祫即祫也上追始祖所自出之帝而祀之非王者不禘故曰禘合羣廟之主於太祖之廟而祭故曰合先儒分為二非也然此經云追享朝享者追享祀太祖所自出之帝朝享享太祖也言祀所自出之帝與太祖其用彝皆同非析為二祀也古人重朝食其祭亦然朝踐即朝獻再獻即饋食亦畧為隆殺

凡六彝六尊之酌鬱齊獻酌醴齊縮酌盎齊況酌凡酒脩

酌大喪存奠彝大旅亦如之

齊才細反獻音儀素何反況舒銳反脩作滌

酌沛之使可酌也齊和齊之獻讀爲摩莎之莎鬱鬯煮  
鬱和秬鬯以釀酒摩莎沛之出其香汁醴齊尤濁和以  
明酌沛之以茅縮去其滓盎齊差清和以清酒沛之而  
已說拭勺而酌也凡酒謂三酒也滌酌以水和而沛之  
大喪遣奠時所奠之彝存之不徹以待親也大旅國  
有大故之祭亦存其尊彝不徹蓋亦將寢之以祈

司几筵掌五几五席之名物辨其用與其位

五几玉彫彤漆素五席莞藻次蒲熊其華萑席喪用非  
常器用位所設之席及其處陳氏辨道曰筵席之制短  
不過尋長不過常中則九尺純緣上不過黼下不過緇  
布王氏應電曰古席地而坐鋪地者爲筵加筵上者  
爲席筵之言延所以  
延神與賓席藉也

凡大朝覲大饗射凡封國命諸侯王位設黼依依前南鄉  
設莞筵紛純加纁席畫純加次席黼純左右玉几祀先王

昨席亦如之

補音甫依於豈反鄉計亮反純章先反纁音早

依制如屏風纁以絳帛為質纁白黑文而為斧形以置於依大朝觀會同大饗廟饗大射王將祭擇士而射於依前為王設席左右有几俛至尊也莞細蒲紛純以紛帛為緣纁加藻飾次桃枝竹席有次列成文几坐而馮以為安者古朝觀天子皆立此几蓋既見而燕息者昨讀為酢謂祭祀及王受酢之席

諸侯祭祀席蒲筵纁純加莞席紛純右彫几昨席莞筵紛純加纁席畫純筵國賓於牖前亦如之左彤几甸役則設

熊席右漆几

纁胡內反甸音田

分布采色曰纁幕成物體曰畫天子昨席與祭祀同諸侯昨席與祭祀席異蓋惟天子至尊席可與鬼神同亦由天子之昨用醴齊與鬼神同尊諸臣之昨席用帛與鬼神異尊也國賓諸侯來朝孤卿大夫來聘皆以賓禮

接之席設於牖前南鄉而君在阼階之主位左彤几承  
昨席並言熊席王旬有司祭表貉所設席几有左右陰  
事尙右陽  
事尙左也

凡喪事設蒿席右素几其栢席用荏黼純諸侯則紛純

敦一几凡吉事變几凶事仍几

栢音迫荏音敦音對

喪事謂凡奠也韋席凡弔者之坐栢席近喪柩之席用  
荏較細以尊死者也故用黼純敦盛黍稷器每敦一几  
如亡者之就食而憑几也變几視於室饋食於堂  
釋於廟每事易几凶事几奠朝夕仍几喪禮思也

天府掌祖廟之守藏與其禁令凡國之玉鎮大寶器藏焉  
若有大祭大喪則出而陳之既事藏之凡官府鄉州及都  
鄙之治中受而藏之以詔王察羣吏之治

藏貨財曰府天尊之之詞玉天球之類可爲國鎮者寶器兌戈和弓之類歷代所寶者藏於始祖之廟重先人所遺非示觀美也治中治職簿書之要  
詔王察羣吏之治與家宰相考厥也

上春釐寶鎮及寶器凡吉凶之事祖廟之中沃盥執燭季冬陳玉以貞來歲之嫩惡若遷寶則奉之若祭天之司民司祿而獻民數穀數則受而藏之

上春孟春與季冬皆夏至也周雖以十一月爲年節而凡民事仍用夏令此可以見曩日久而有缺隙者吉事四時之祭凶事王及后喪朝於祖廟之奠小祀與夏官小臣職沃盥而天府爲之執燭非祖廟事則不與執燭也玉禮神之玉大小問來歲之美惡於龜則天府爲之陳玉遷寶玉者遷都則寶亦遷奉送於新廟之天府仍藏之司民軒轅角司祿文昌第六星祭司民然後獻民數祭司祿然後獻穀數獻於王王以之藏於天府民爲

王者所天食  
為民天也

典瑞掌玉瑞玉器之藏辨其名物與其用事設其服飾

執於人曰瑞禮神曰器名物名與色也用事  
事異而用玉亦異服飾服玉之飾謂纁藉也

王晉大圭執鎮圭纁藉五采五就以朝日公執桓圭侯執

信圭伯執躬圭纁皆三采三就子執穀璧男執蒲璧纁皆

二采再就以朝觀宗遇會同於王諸侯相見亦如之塚圭

璋璧琮纁皆二采一就以類聘朝直道反信音身琢  
直轉反類他弔反

晉讀為指插於紳帶之間也執手執之大圭長三尺橫  
素無文唯近首稍殺去之鎮圭尺有二寸篆刻四鎮之  
山纁藉纁組為藻飾以藉玉五采五色一行為一就蓋  
圭長尺二寸廣三寸木版亦長廣與圭同用常衣之畫

其外作采就春朝朝月常禮也發大政亦拜日於東門  
之外桓信等義見前璩有圻鄂璩起也璩圭璋八寸璧  
琮八寸以類聘使臣不  
得執君之圭璧故用此

四圭有邸以祀天旅上帝兩圭有邸以祀地旅四望裸圭  
有瓚以肆先王以禋賓客圭璧以祀日月星辰璋邸射以  
祀山川以造贈賓客土圭以致四時日月封國則以土地

邸下禮反射食  
亦反造七到反

邸本也四圭各出而同一本以象四時故以祀天與上  
帝祀天圜丘之祭上帝五帝也兩圭分出而同一本以  
象地偶故以祀地與四望裸圭於圭頭為器如勺名曰  
瓚可以挹鬯裸祭肆大祭也圭璧下璧而上琢為圭璋  
邸射有本而刻其上至館而致饌曰造出郊而致饌曰  
贈致考驗也土地猶度地也以土圭度日景觀分寸長

短以制其封域

珍圭以徵守以卹凶荒牙璋以起軍旅以治兵守璧羨以起度駟圭璋璧琮琥璜之渠眉疏璧琮以斂尸穀圭以和難以聘女琬圭以治德以結好琰圭以易行以除慝

駟作組難

乃旦反琬於阮反好呼報反琰以冉反行下孟反

珍圭當是鎮圭徵守召守土之諸侯恤凶荒唁問或賑助之牙璋琬以爲牙牙齒兵象故以發兵守戍守也璧羨璧之不圓者蓋璧本徑九寸而圓減旁一寸以益於上下是縱一尺橫八寸以縱計之十寸起度十尺爲丈十丈爲引以橫計之八寸起度八尺爲尋倍尋爲常恐度有時而素故以璧羨存諸王府爲考驗之準駟讀爲組圭璋璧琮琥璜六者皆玉名兩頭皆有孔孔穿如渠爲渠下上兩旁稍高爲肩以組穿渠而繫於肩用以斂



尸玉能輕身故斂以六玉神則其死之意圭在左璋在首琥在右璜在足璧在背琮在腹璧琮在背腹恐壓尸體故藏置之也朱子疑斂不可用玉引季孫用玉孔子言其不可然用玉乃天子之禮故孔子非之若後世發墓之事乃情理所無聖人不必預防之而輕其父也穀善也其飾若粟文然難仇讐和平其爭聘女則以納徵琬圭無鋒芒故以賜有德以結諸侯之好琰圭有鋒芒易行改惡行慝罪也賜諸侯使改惡遷善蓋先事警之戒

大祭祀大旅凡賓客之事共其玉器而奉之大喪共飯玉含玉贈玉凡玉器出則共奉之

玉器四圭裸圭之屬飯玉碎玉以雜米也含玉柱左右齒及口中者贈玉諸臣之喪天子賜之以玉凡玉器用時出而奉之事畢則藏之

典命掌諸侯之五儀諸臣之五等之命上公九命爲伯其  
國家宮室車旗衣服禮儀皆以九爲節侯伯七命其國家  
宮室車旗衣服禮儀皆以七爲節子男五命其國家宮室  
車旗衣服禮儀皆以五爲節王之三公八命其卿六命其  
大夫四命及其出封皆加一等其國家宮室車旗衣服禮  
儀亦如之凡諸侯之適子誓于天子攝其君則下其君之  
禮一等未誓則以皮帛繼子男

五儀公侯伯子男之儀  
命命之也上公王之三

五等公孤卿大夫士也儀禮儀  
公有德者加命爲二命若二王  
此例九七五陽數也故以命在  
也故以命在內之公卿大夫王

之公卿大夫或出外為  
無出封之理誓猶命也  
誓戒之辭王氏應龍曰  
侯適子必其賢足以繼  
其為嗣君故攝君行禮  
道也未誓則不得執玉

諸侯皆加一等不言士者士卑  
不曰命而曰誓者命之時當有  
周立適然亦有象賢之意而諸  
世天子乃命為世子既誓則成  
則執玉而下其君一等子  
而執皮帛繼於子男之後

公之孤四命以皮帛  
其士一命其官室車旗衣  
卿大夫士亦如之  
其官室車旗衣服禮儀各  
卿再命其大夫一命其士不命  
卿再命其大夫一命其士不命  
其官室車旗衣服禮儀各  
卿再命其大夫一命其士不命

九命之上公乃得置孤  
祗小國之君其出封則  
之卿大夫亦以是為差  
夫亦再命一命重其與

卿一人故公之孤四命以皮帛  
為子男自非公之孤可比侯伯  
非謂如其四命也子男之卿大  
君共守土治民也按此止言命

數之常禮其公侯伯子男之卿大夫亦不盡有命故魯仲不敢當卿禮晉羣卿獻捷於荆周讓之以不使命卿也

司服掌王之吉凶衣服辨其名物與其用事王之吉服祀昊天上帝則服大裘而冕祀五帝亦如之享先王則袞冕享先公饗射則鷩冕祀四望山川則毳冕祭社稷五祀則希冕祭羣小祀則玄冕凡兵事常弁服既朝則皮弁服凡甸冠弁服凡凶事服弁服凡弔事弁綬服

鷩卑毳反毳昌銳反希本又作

緇知倚反甸音田冠去聲

大裘羔裘也土之吉服袞無章尚質也冕俛也

六自袞冕而下皆有章數惟大言當俛以致恭之意袞卷龍衣

也天子冕服十二章虞書日月星辰等是也日月星辰亦畫於旂常天子以下則不敢服日月星辰以九爲節鷩畫以雉卽華蟲也先公后稷之後太王之前不窋至諸鬻王氏安石曰先公非卑於先王也祭則各以其服授尸尸服如是王服衰以臨之非敬也饗射殺於朝襲故不服衰而亦服鷩畫虎雖如獬豸而大希冕服刺粉米無畫元者衣無文裳刺黻而已以上皆卽冕以明衣服亦異弁本作并象兩手相合形其制上銳非如冕常弁以繡常爲之皮弁以白鹿皮爲弁存太古之質其服用白布衣積素以爲裳冠弁服加皮冠於禮冠之上謂將田習兵之時若正田時則當戎服凶弔亦服弁以其素也其衰服各如其所宜服而弔則加經焉

凡喪爲天王斬衰爲王后齊衰王爲三公六卿錫衰爲諸侯總衰爲大夫士疑衰其首服皆弁經大札大荒大戴素

服  
錫思  
纘反

君與父等王后下君一等故服斬衰齊衰異君爲臣無服直弔服既葬除之喪服自斬衰三升三升半齊衰四升五升六升大功七升八升九升至小功十一升十二升止矣至十五升則爲吉布總麻用十五升之半疑亦然疑者擬也大夫士降於諸侯亦如其弔服故疑之也所以疑者大夫士有德亦可命爲諸侯是以優之也其錫與總之制錫則濕治其布凶荒裁素服編冠恐懼修省之意治其纁而不濯治其布凶荒裁素服編冠恐懼修省之意

公之服自袞冕而下如王之服侯伯之服自鷩冕而下如公之服子男之服自毳冕而下如侯伯之服孤之服自希冕而下如子男之服卿大夫之服自玄冕而下如孤之服其凶服加以大功小功士之服自皮弁而下如大夫之服

其凶服亦如之其齊服有玄端素端齊側

皆反

自袞冕而下如王服有九章不得如王之十二章也侯伯自鷩冕而下如公不得服袞冕也自公之袞以下至卿大夫士之元冕與皮弁皆朝聘天子及助祭之服上得兼下下不僭上凶服亦然加大功小功總承孤卿大夫而言天子諸侯乃絕旁期惟服齊斬卿大夫加大功小功而士無降服則加總亦可知矣齊或元或素為札荒有所禱請也古衣身二幅袂亦二幅俱長二尺二寸祛尺二寸自腋下至祛圍殺一尺吉凶禮服皆同大夫以上祛不殺亦如其袂謂之侈袂

凡大祭祀大賓客其其衣服而奉之大喪其其復衣服斂

衣服奠衣服廡衣服皆掌其陳序

廡虛今反

大祭祀大賓客所其衣服蓋袞冕之屬奉送也小祭祀則不親奉衣服有藏於玉府者玉府亦以授司服而共

之故兩職俱共復衣服復衣服以招魂斂衣服小斂十  
九稱大斂百二十稱之服奠衣服奠時設之以憑神者  
以在殯未有尸故也若既葬則遺衣服投守祔藏之以  
待祭而投尸矣廬衣服明器之衣服藏於棺中陳序陳  
之有次序也

典祀掌外祀之兆守皆有域掌其禁令若以時祭祀則帥  
其屬而脩除黷役于司隸而役之及祭帥其屬而守其厲  
禁而蹕之

外祀祀於四郊者皆有兆域禁人勿妄入及將祭則帥  
其胥徒脩除芟埽之並召司隸使助工及祭清道警蹕  
以昭嚴肅

守祧掌守先王先公之廟祧其遺衣服藏焉若將祭祀則



各以其服授尸其廟則有司脩除之其祧則守祧黜之

既祭則藏其隋與其服黜於糾反聖鳥路反或鳥洛反隋呼規反又許悲反

先公大王以前遷上所藏曰祧尸服卒者之上服以象其生有司脩除上典祀側屬等是黜聖亦有司事得其事在廟內守祧蒞之故云然隋尸用以祭肺與黍稷之屬以其為神所用故祭後即埋之服則仍藏之於廟而已均云藏埋亦藏也

世婦掌女宮之宿戒及祭祀比其具詔王后之禮事帥六官之人共齋盛相外內宗之禮事大賓客之饗食亦如之

比毗志反齋音咨食音嗣

女宮女春女館之等以列職於官中故曰女宮宿戒夙當戒備之事比次第之世婦左右於后一切禮儀次第

皆其所詔共盛盛臨視整飭之外內宗佐后於祭時世婦相之使無失禮后有佐王禮賓之法世婦亦佐之

大喪比外內命婦之朝莫哭不敬者而苛罰之凡王后有操事于婦人則詔相凡內事有達于外官者世婦掌之

暮苛胡何反  
操古拜字

苛謹也肆師令外內命婦序哭世婦比而察之拜拜謝也王於諸臣有拜則后於婦人亦有當拜者達於外官授內小臣開寺之屬而使達之

內宗掌宗廟之祭祀薦加豆籩及以樂徹則佐傳豆籩賓客之饗食亦如之王后有事則從

婦人無外事惟宗廟祭祀則后與焉然其薦加豆籩內宗爲之后不親薦禮有殺也佐傳佐外宗有事謂吉凶

之事

大喪序哭者哭諸侯亦如之凡卿大夫之喪掌其弔臨

序哭者次序當哭之人哭諸侯諸侯來朝薨於王國王為之總衰或同姓后官亦有哭者王后弔臨諸侯而已卿大夫則內宗掌之

外宗掌宗廟之祭祀佐王后薦玉豆眡豆遵及以樂徹亦如之王后以樂羞盥則贊凡王后之獻亦如之王后不與

則贊宗伯

與音預

眡視其實亦如之亦佐后眡也羞進也盥黍稷贊猶佐也贊宗伯后有故不與祭宗伯攝其事御案內外宗各有專職有兼事薦加豆遵內宗之專職佐傳豆遵則兼事也佐后薦玉豆眡豆遵外宗之專職以樂羞盥則

贊其兼事也內宗王族之女故后有事則從外宗非諸臣之配偶則子婦也人數校內宗爲多故可兼佐宗伯  
小祭祀掌事實客之事亦如之大喪則敘外內朝莫哭者哭諸侯亦如之

小祭祀在宮中若門戶竈之屬外內外命婦內則內宗外宗也

家人掌公墓之地辨其兆域而爲之圖先王之葬居中以昭穆爲左右凡諸侯居左右以前卿大夫士居後各以其族凡死于兵者不入兆域凡有功者居前以爵等爲丘封之度與其樹數

公對私而言圖畫其地形 御案諸侯謂王子始封者如周公葬於畢之類若畿內諸侯卽卿大夫是次其上

別無諸侯居左右以前後非左右排列也如文王之子則皆附於左而爲昭武王之子則皆附於右而爲穆而又於其中分爵等以相前後前少進而近於墓道之中央後少退而遠於中央各以其族者繼世之王以昭穆分左右凡一王之子孫皆從葬焉過此則別授之兆如國民之有私兆域矣諸侯不敢逾天子尊尊也葬則可附親親也死於兵王族以罪誅者自功者居前居左右之前壘土爲邱封固爲封度與樹數皆有別以爵等分大喪既有日請度甫窆遂爲之尸及窆以度爲丘隧其喪之窆器及葬言鸞車象人及窆執斧以泣遂入藏凶器正墓位蹕墓域守墓禁凡祭墓爲尸凡諸侯及諸臣葬于墓者授之兆爲之蹕均其禁

又補鄭反

日葬日度穿土封穴隧道雖有定制而有因時異宜者請之以便奉行甫始也爲尸以祭后土隧入穴之道天

子曰隨上有負土請侯曰羨上無負土多器下棺豐碑之屬驚車遣車象人芻靈也皆明器車以爲死者所乘束草爲人以給事死者欲其如生故當葬時以血塗其車及芻靈之口若使之言也執斧以泄匠師凶器門器正墓位正之使後之附葬者各以序蹕止行人不得近之禁禁制不得漫入凡祭墓未葬時祭后土已成祭復祭后土皆家人爲尸也請侯及諸臣皆王族義已見上其葬時皆家人授之兆爲之蹕均其禁而使不得相侵

墓大夫掌凡邦墓之地域爲之圖令國民族葬而掌其禁令正其位掌其度數使皆有私地域凡爭墓地者聽其獄訟帥其屬而巡墓屬居其中之室以守之

邦中墓地萬民所葬地民之葬地亦設官掌之者恐其妨可稼之地且教之親親尊尊也族葬各從其親禁令

位度數見上文其法皆自天子而差爭侵越不如法墓  
厲害也山林禽獸及物怪或有害於墓者令民於墓中  
為室使人居守而墓大  
夫則帥其屬時巡之也

職喪掌諸侯之喪及卿大夫士凡有爵者之喪以國之喪  
禮泄其禁令序其事

諸侯之喪來朝而薨於王國者卿大夫士及有爵  
皆謂畿內喪禮有常典恐其遺越職喪臨視之

凡國有司以王命有事焉則詔贊主人凡其喪祭詔其號  
治其禮凡公有司之所共職喪令之趣其事趣音促

凡國之有司以王命有事於喪禮職喪詔主人以禮之  
所宜而贊其事號牲號齎號若柔毛剛熇嘉薦普淖之  
類凡禮當為公有司所共者  
令之使如法趣之使速共

大司樂掌成均之灋以治建國之學政而合國之子弟焉  
凡有道者有德者使教焉死則以爲樂祖祭于瞽宗

大司樂樂官之長人之德性以習俗而移古人幼學卽  
以樂舞教之使習於中和及於大成不外乎是故孔子  
曰興於詩成於樂也成均大學學官名國子弟王子弟  
公卿大夫之適子國之倖國之俊選皆出小學而升於  
大學至大學則其於道德已有得矣故以大司樂之學  
政更陶成之學政下文樂德等是古之爲樂師者多道  
德之士其心靜而其業專且久久則習於中和之則故  
大學用之凡有道德者皆謂瞽師中之良也舉以爲師  
故死則尊爲樂祖祭之於瞽宗瞽宗蓋學官祭先師處

以樂德教國子中和祇庸孝友以樂語教國子興道諷誦  
言語以樂舞教國子舞雲門大卷大咸大磬大夏大濩大



武祇音支興許應反卷音

中不偏倚和不乖戾祇敬也庸有常也善事父母為孝  
善愛弟為友敬兄亦該焉樂由人心而生人心邪正之  
微樂即傳之此六德者盡其道於平時而養其性於至  
熟然後播為聲樂合乎中和以此教國子其正心誠意  
之功服習者有素而此更勵以隱微存義克治之極功  
也樂語者辭氣本心而出平日服習於中和臨時又審  
於言語興即物喻理如詩之因物起興道讀為導以古  
喻今引之於善諷微語風動之誦直誦古人陳言以曉  
警之言不待問而言其事理語答其所問六者皆當其  
節所謂不學詩無以言也舞者所以舒暢其筋骸而發  
揚其志氣以六代之樂舞節之則無弊凌暴厲之氣雲  
門大卷黃帝之樂大咸即咸池堯樂大磬舜樂大夏禹  
大濩湯大武  
周武樂也

以六律六同五聲八音六舞大合樂以致鬼神元以和邦

國以諧萬民以安賓客以說遠人以作動物

說音悅

律法也法天地陰陽之義同亦同乎陰陽陰陽其成其功而後有氣化也六同即六呂五聲宮商角徵羽乃人身自然之天籟第無以養其本調其平則不合於中和暢之以八音齊之以六律六同而無偏倚駁雜之弊斯成樂矣舞義見上上文言教以樂德樂語樂舞蓋平日講明而服習其情文者已裕乃大合樂而奏為小成大成於是鬼神可致邦國可和萬民遠人動物皆可以感蓋天地一元之氣流行於品物而無處不有其中和樂得其中和則自然相成有非強合之也六者侈言其效如此

乃分樂而序之以祭以享以祀

分樂而序如下文所云樂各有所宜故分而序之祭祭天神享享人鬼祀祀地元合言之皆可謂之祭

乃奏黃鍾歌大呂舞雲門以祀天神乃奏大簇歌應鍾舞

咸池以祭地元乃奏姑洗歌南呂舞大磬以祀四望乃奏  
蕤賓歌函鍾舞六夏以祭山川乃奏夷則歌小呂舞大濩  
以享先妣乃奏無射歌夾鍾舞大武以享先祖凡六樂者  
文之以五聲播之以八音

族七豆反磬音部製如帷反函胡南反

奏素樂而不歌黃鍾子月之律萬物之所從出故奏以  
祀天神符陽氣也歌人聲也大呂丑月之律日在子而  
月在丑陰陽相合之義下彷彿此黃帝正名百物以明民  
其財日月星辰運化照臨以成大功故舞雲門以配之  
月建寅而日在亥故奏大簇歌應鍾地次於天而實天  
功所賴以成寅月萬象回春而其機則自亥萌芽之堯  
時成功文章始備故舞咸池以配之月在辰而日在酉  
故奏姑洗歌南呂辰月春光明媚舜紹堯而恭己無爲  
故舞大磬以配之四望奠位以宣天地之化故以祀之  
月在午而日在未故奏蕤賓歌函鍾午未陰壯山川地

氣之盛而流峙者故以祀之大夏大也函鍾卽林鍾月  
在申而日在巳故奏夷則歌小呂蕤有救護義湯救民  
於水火故樂名大濩申秋氣與巳相形舞以大濩護陽  
氣也先妣姜嫄也姜嫄誕后稷不特開周之基且垂萬  
世生養之利秋氣肅殺實以成物且金者天地之元氣  
也金至申而生一元之氣至此而已盛故以享先妣月  
在戌而日在卯故奏無射歌夾鍾陽氣一陽始於子至  
卯而旺至戌而九陽終先祖后稷也用之得當后稷粒  
食生民其功已茂如中春之旺至武王有天下而其功  
德畢顯故舞大武也凡此六樂皆待五聲八音而成文  
聲容兼美分布  
均平卽中和也

凡六樂者一變而致羽物及川澤之元再變而致羸物及  
山林之元三變而致鱗物及丘陵之元四變而致毛物及  
墳衍之元五變而致介物及土元六變而致象物及天神

文猶文飾播均有也益天地間皆和氣所散布人爲之主無能合天地之中和者則有情亦無情矣樂極於和故變而感致諸物羽物輕疾川澤通竅故致之易鱗介墳衍之屬較遲重故致之稍難此亦大概言凡有情之物皆可致也象物龍鳳龜鱗也物之異者與天神非有德則不能致

凡樂圜鍾爲宮黃鍾爲角大族爲徵姑洗爲羽鼙鼓鼙鼓孤竹之管雲和之琴瑟雲門之舞冬日至於地上之圜丘奏之若樂六變則天神皆降可得而禮矣凡樂函鍾爲宮大族爲角姑洗爲徵南呂爲羽靈鼓鼙鼓孫竹之管空桑之琴瑟咸池之舞夏日至於澤中之方丘奏之若樂八變則地元皆出可得而禮矣凡樂黃鍾爲宮大呂爲角大族

爲徵應鍾爲羽路鼓路鼗陰竹之管龍門之琴瑟九德之

歌九磬之舞於宗廟之中奏之若樂九變則人鬼可得而

禮矣

圓千權反角如字古音鹿大族之大音泰徵張里反雷同九磬之九作大

上文言樂之理備矣此又言分配天神地元人鬼相感召之義爲宮以之起調也圓鍾卽夾鍾卯月之律黃鍾子律大族寅律姑洗辰律一陽生於子而旺於卯天神陽也故以祀之雷鼓雷鼗皆八面鼓懸之曰鼓有柄曰鼗雷乃天聲孤竹特生取陽數雲和空桑龍門皆山名雲門黃帝樂皆取其類於天圜丘白然之丘圜而象天六變自子至午而陽極盛南鍾卽林鍾六月之律坤位於西南故以爲宮而起調南呂酉律萬物受氣於天而成形於地土德之大以其成天之功而生成萬物也人生於寅物華於卯成功於酉地德育物之始終可見故以之祀地元靈鼓鼗發皆六面六陰數之盛孫竹作根之末生者象子生孫生生不窮之義空桑咸池皆取其

虛而能受也方邱取澤中自然之邱方而象地者八變  
陰數之極天地本一也自其成象成形言則儼然有二  
天以陽為主而施生生之氣始於子故於冬至祀天  
於南郊迎陽氣也而南郊者陽氣極盛之方地主乎陰  
而成物生成之氣於南故於夏至祀地於北郊迎陰  
氣也而北郊者陰氣極盛之方陰陽互為其根互成其  
用而實則一元之氣流行屈伸消長之機耳人為天地  
之主天子尤人神之故德法中和樂臻盡善而天神  
地元可禮黃鍾子月律大呂丑律應鍾亥律天地一元  
之氣未嘗少息亥月陰盡木葉脫而實則新萌已茁至  
子月則陽生歷丑寅而盛矣人有生必有死生之氣自  
子而丑而寅而盛死之氣至亥而成然有德者形沒而  
神存死而不亡人鬼則有德而靈者也即子孫亦不忍  
死其祖考故以黃鍾起調為官而起調寓存而不亡之  
義九變者陽數起於一終於九天地之數奇變而偶不  
變祭人鬼以此取變化無窮生生之義先王之仁也亦  
天地自然之理也其五聲八音皆必相需而成調此言  
律不備其數各從其所重言之耳而先儒紛紛議論皆

非也陰竹生於山陰者龍門水中之山陰中之陽意九德六府三事九磬舜韶樂舜立人倫之極以九德化民以九磬格天地以此樂舞祭人鬼所以勉人承天地而學聖人也

凡樂事大祭祀宿縣遂以聲展之王出入則令奏王夏尸

出入則令奏肆夏牲出入則令奏昭夏帥國子而舞大饗

不入牲其他皆如祭祀

縣音懸

凡樂事所設者廣大祭祀尤重故又特言之宿縣前宿豫縣之展叩其聲以審其完好否王夏三夏肆夏九夏之三合合鐘師也帥國子當用舞各帥以往大饗有三饗帝於明堂祫祭先王饗諸侯來朝殺牲於門外烹之升鼎乃入故云不入牲則亦不奏昭夏也其他皆宿縣展聲帥舞

大射王出入令奏王夏及射令奏騶虞詔諸侯以弓矢舞



王大食三侑皆令奏鍾鼓王師大獻則令奏愷樂

伯音又愷音坎

大射王將祭擇士而射於西郊虞祥也騶虞召南之卒章諸侯來朝將祭預於大射則樂師詔以射之舞節謂執弓挾矢揖讓進退之節也大食朔月月半侑猶勸也若常食亦以樂侑食但樂師令之不須大司樂也大獻獻捷於祖愷樂除暴安良使民愷樂意

凡日月食四鎮五嶽崩大傀異哉諸侯薨令去樂大札大

凶大哉大臣死凡國之大變令弛縣凡建國禁其淫聲過

聲凶聲慢聲大喪弛廢樂器及葬藏樂器亦如之

傀音怪去起呂

反縣音懸  
廢許金反

四鎮山之重大者為一方之鎮也言四鎮五嶽舉山以該濟也大傀大怪異哉為害於民也去樂藏之札疫癘

凶凶年裁水火大臣畿內孤卿以上弛釋下其器皆徹  
懼同憂之意淫聲若鄭衛之音過聲謂失節凶聲亡國  
之音慢聲傲僻之音凡音之起由人心生政教和而人  
心正乃為善治建國將以樂化民故禁其非者廢樂器  
陳明器之樂器而大司樂治之廢興也以其始  
作而即將藏之故字從大藏樂器即藏此樂器

樂師掌國學之政以教國子小舞凡舞有帔舞有羽舞有

皇舞有旄舞有干舞有人

舞

帔音拂

樂師佐大司樂教其屬者帔舞六者皆包大小舞而言  
人習其一謂之小舞合眾而大衍之有綴兆行列進退  
止齊節之以聲音以象其功德謂之大舞帔舞析五采  
綵為之羽舞析白羽皇舞五色羽如鳳皇色旄舞牦牛  
之尾干舞持干而舞兵舞也人舞徒手而舞以袖為儀  
凡此六舞兼有文武其雜見於禮經者不一未定其所  
專屬之事鄭康成確指其用亦聊備一說而已

教樂儀行以肆夏趨以采  
齊車亦如之環拜以鍾鼓為節

齊木又作齊徐私反

王太子元子等皆入學故樂師教以樂儀非謂為王時始教之也肆夏采齊皆樂名行與步趨以之為節則舒徐和平車行有緩急鸞和之聲動則應節環旋也拜直拜也按此皆謂行禮及見賓客時而習之有素則平居無事亦從容中節夫子于申申天天是其概也

凡射王以騶虞為節諸侯以貍首為節大夫以采蘋為節

士以采芣為節

射者必內志正外體直其容體比於禮其節比於樂騶虞數者皆以為節者惟貍首詩逸餘皆見詩其義則思於射義已詳

凡樂掌其序事治其樂政凡國之小事用樂者令奏鍾鼓

凡樂成則告備詔來瞽舞及徹帥學士而歌徹令相何

何 泉

敖反相  
息亮反

息元反

序事陳列樂器及作樂次第序之使不繆樂政凡聲音  
器物之備否時節之先後樂舞之誼意皆是小事小祭  
祀成八音俱作一曲終也詔來瞽詔眡瞭扶瞽者來入  
也皋舞高聲呼當舞者舞學士凡入學之士徹者歌雍  
令相令眡瞭扶樂  
工兼始終而言

饗食諸侯序其樂事合奏鍾鼓令相如祭之儀燕射帥射夫以弓矢舞樂出人令奏鍾鼓凡軍大獻教愷歌遂倡之凡喪陳樂器則帥樂官及序哭亦如之凡樂官掌其政令

# 聽其治訟

御案上經掌其序事總言凡樂事此又云序其樂事見饗食諸侯之禮重也覆舉序樂令奏令相知饗食之異於祭者無來瞽臬舞歌徹三事指言諸侯則饗食王國之卿大夫及聘卿不必然燕射因燕而射射大衆耦也以弓矢舞見上樂出入謂笙歌有奏衆樂而兼鍾鼓時有單奏鐘鼓時隨其事而爲之節大獻獻捷於祖廟愷歌非常用故臨事始教樂工習之以便獻捷歌之倡道其先也凡喪謂國喪帥樂官而陳器序其當哭者凡樂官謂大胥至司干其政令及治訟掌之聽之不以煩大司樂

大胥掌學士之版以待致諸子春入學舍采合舞秋頒學合聲以六樂之會正舞位以序出入舞者比樂官展樂器凡祭祀之用樂者以鼓徵學士序官中之事

舍讀作釋采音萊此必里

反

學士之版學於大學者之名籍諸子凡鄉學小學之學  
士以漸而升於大學有版則升補可稽舍采與釋奠異  
釋奠迎牲酌獻授舞者器舍采不舞不授器但以蘋藻  
蘊藻之類致虔而已春祭樂祖因而合舞秋祭樂所習  
之業因而合聲蓋秋而頒之春而合之以觀其能否皆  
謂祭先師時舞聲互言之非偏舉也若春秋教以禮樂  
秋冬學羽籥則謂平日講習時與此不同合者舞節與  
樂聲比也入於綴兆出退休也序正其行列次第比  
較也以時校其能否展陳也以時省其備缺徵召也祭  
祇用樂乃以鼓召學士或使供職或使觀禮至饗燕之  
樂則學士不與以自有樂工優學士而尊其志節也  
宮中之事亦樂事王及后恆食皆以樂侑食則序之  
小胥掌學士之徵令而比之釐其不敬者巡舞列而撻其  
怠慢者正樂縣之位王官縣諸侯軒縣卿大夫判縣士特

縣辨其聲凡縣鍾磬半為堵全為肆

堵丁古反

比校也縣謂爵也建猶扶也陳氏陽曰大胥正舞位則鄭也所以為綴此巡舞列列則份也所以為行樂縣鐘磬之屬懸於箱庑者宮縣四面縣如宮室之四面有牆故曰宮縣軒縣三面其形曲去其南面辟王也判縣左右縣特縣一面或東方或阼階也御案鐘磬在虞作上下兩列一列八枚謂之堵即半也合兩列則全而為肆全者全十二律與四清聲也

大師掌六律六同以合陰陽之聲陽聲黃鍾大蕤姑洗蕤

賓夷則無射陰聲大呂應鍾南呂函鍾小呂夾鍾皆文之以五聲宮商角徵羽皆播之以八音金石土革絲木匏竹

凡樂工皆以瞽瞍之賢者為之師大師其長也御案六律五聲八音大司樂既言之蓋大司樂總其事而序

# 六律爲之音

教六詩曰風曰賦曰比曰興曰雅曰頌以六德爲之本以

其用大師則專其職而辨其聲也天地之道在陰陽陰陽消長而萬物生成其播於四時者尤顯著也樂以象天地之和聖人制律呂以肖十二辰名義因之陽左旋陰右轉相生相成以五聲爲主而八音諧之得其中和則天地人一氣相孚而無間先儒言隔八相生以律管長短之數言推極其理無不可同然特氣數之末耳十二律皆有五聲而旋相爲宮八音者天地所生之物其聲皆分得天地之氣故制爲樂器以宣天地之和也

教六詩教瞽矇及學士也凡音之起生於人心而心之動因言以宣不得其正則爲害匪淺以詩爲之樂章分別其義類或歌或吹施之各得其宜用之各得其正而性情與聲樂皆和此所以使人潛移默化其氣質也風微言諷動之賦直陳其事比以他物此興借物引起所詠之事風民間歌謠可以觀民風者雅正也朝廷之



作謂其可以正天下之風俗頌用於祭祀美盛德之形容風雅頌詩之名比興賦詩之體分爲六詩言之者於人釋其義而求其當也六德卽大司樂所教中和祇庸孝友是以六德爲本然後性情正而偏私除以六律爲之音而後中和得而神人格

大祭祀帥瞽登歌命奏擊拊下管播樂器令奏鼓輦大饗亦如之大射帥瞽而歌射節大師執同律以聽軍聲而詔吉凶大喪帥瞽而厥作圜諡凡國之瞽矇正焉

拊音撫輦音引厥希

金反又喜願反匱古樞字

登歌登堂而歌拊樂器如鼓以韋爲之實之以糠擊拊瞽乃歌下管吹管者在堂下輦小鼓也鼓擊也分布眾樂器於堂下先擊小鼓管乃作射節上文騶虞等聽軍聲而詔吉凶者人爲萬物之靈其氣與天地相通心之

所事輒有其驗况軍行師眾因危之事其氣機必先有兆大師哉同律而聽軍聲以考眾志之齊一與否若師曠聽北風南風是其事也庶興也言王之行御案證以易名苟失其實則欺天地神明不誠於君父而見疑於天下後世故至於南郊稱天以誅之非王及公卿大臣所敢專也大師及羣誓曰王爲世子入學之時而性質言動聞之已詳終王之身師與誓常在側且多有道德者俾各陳王之行迹而大師取衷焉蓋天子至尊所畏者惟天所懼者惟公議故定論於南郊以示天鑒之甚明陳言於羣誓彰人心之公是所以大爲之防而正君德也正謂

正其得失

小師掌教鼓鼗祝敔塤簫管弦歌大祭祀登歌擊拊下管擊應鼓微歌大饗亦如之大喪與厭凡小祭祀小樂事鼓

棟掌六樂聲音之節與其和

祝處郁反敵魚呂反  
塤虛驚反與音預

大師掌律呂音聲之總小師按器而教之鼓大鼓鼗小鼓兩旁有耳持其柄搖之旁耳還自擊祝如漆笛中有椎方二尺四寸深一尺八寸投椎其中而撞之敵如木虎背上有二十七鉏鉞刻以木長尺櫟之以止樂塤燒土爲之象秤鍾有六孔簫編竹爲之形象鳥翼大者二十四管小者十六管有底管如遠而小併兩而吹之弦琴瑟也歌依詠詩也應應鼙也與輦皆小鼓小師亦自有拊擊之佐大師令奏小師復爲之倡也與其事小祭祀小樂事則小師專之而大師不親之節長短節徐和相應而不相陵六樂聲音之節與和樂工皆知而小師執其總

瞽矇掌播鼗祝敔塤簫管弦歌謠誦詩世奠鼗鼓琴瑟掌九德六詩之歌以役大師

用樂時瞽矇但主弦歌而已以其知音故兼律呂諸器而審其音播鼗揚其音也世奠繫歷代帝王善敗之事先

王定為冊以貽後如今世系瞽矇值王暇時則誦詩誦此以著前世之得失以昭戒王時或奏琴瑟以養王心之和平九德六詩見上役為之使

眠矇掌凡樂事播鼗擊頌磬笙磬掌大師之縣凡樂事相瞽大喪厥樂器大旅亦如之賓射皆奏其鍾鼓鼗磬獻亦

如之

頌通作鏞相息亮反  
鼗音咸又七到反

眠矇以扶持者亦使習樂事乃能佐瞽者所為也故掌凡樂事縣樂器非有目者不能故掌大師之縣厥樂器興造其樂器大旅有大故而祭亦陳樂器而不作故曰亦如之鼗戒守鼓也其聲疾數愷獻功

典同掌六律六同之和以辨天地四方陰陽之聲以為樂

器

典同主造樂器必能深識律呂之妙而後樂器精當故曰掌六律六同云云也下申明其義

凡聲高聲砒正聲緩下聲肆破聲散險聲斂達聲羸微聲

錯回聲衍侈聲作弁聲鬱薄聲甄厚聲石砒古本反又胡本反破彼義反

餘音間作側百反  
弁音掩甄音震

此言凡聲蓋不止鍾聲而鍾聲亦在其中高聲正聲下聲三聲聲之正也砒聲高而清有鏗鏘若出金石故曰砒也正聲平正之聲不疾不徐和平中正下聲靜細而不高亢三者該清濁高下之全破聲不正也散而無根隙聲不平也收斂而覺滯礙達聲太高也散越有餘竟無收斂微聲太細也幽黯而不清揚回聲迂曲也反復相衍而無餘韻侈達之甚者迫促而無含蓄弁中央寬也聲藏於器而不出如鬱薄器太薄也甄如瓦之薄其聲短脆厚器太厚也扣之如石而無清越之音此即上文所謂辨之者也

凡爲樂器以十有二律爲之數度以十有二聲爲之齊量

凡和樂亦如之齊音

又總言凡爲樂器皆十二律之管爲準而齊其器以十二聲爲諧而適於中和朱子曰數度如黃鐘九寸林鐘六寸之類齊量如磬材有剛柔清濁其聲有輕重高低以十二聲齊量斟酌磨削厚薄令合節奏和謂調其故器

磬師掌教擊磬磬擊編鍾教縵樂燕樂之鐘磬凡祭祀奏縵

樂縵莫半反

御案八音惟石音難調石聲和則眾音可依之以爲準詩曰既和且平依我磬聲鄭康成曰磬亦編於鍾言之者鍾有編有不編不編者鍾師擊之御案鍾師掌其特縣者也編鍾與編磬皆單條理也故使磬師教之

縵如錦縵之殺謂雜聲之和樂者燕樂房中之樂凡祭祀謂小祭祀申言縵樂可用之祭祀故必須教其鍾磬也

鍾師掌金奏凡樂事以鍾鼓奏九夏王夏肆夏昭夏納夏章夏齊夏族夏祗夏騶夏凡祭祀饗食奏燕樂凡射王奏騶虞諸侯奏貍首卿大夫奏采蘋士奏采芣掌鼗鼓縵樂

齊側皆反祗音陔  
騶五羔反食音嗣

金奏擊金以爲奏樂之節也鍾有特縣者有編縣者特縣者大而聲宏若雜奏於八音之間眾音易爲所掩故但於起調畢曲之時擊之以爲作止之節又有鋪差小於鍾亦特縣九夏樂章無考先儒以肆夏繁遏渠爲三夏謂即時邁也執競也思文也而他不備又有謂九夏有調而無辭如笙詩愚謂左傳金奏肆夏之三則九

夏宜皆有辭若無辭則九夏之名從何而別但其辭不可考耳燕樂亦以鍾鼓將射而奏樂以鍾聲之亦以鳴虞等詩爲節鼓擊也磬師奏綴樂鍾師擊鼗以和之其亦必以鍾諧可知矣

笙師掌敎歛竽笙埙簫簫篴篳篥管春牘應雅以敎祗樂凡祭祀饗射其其鍾笙之樂燕樂亦如之大喪獻其樂器及

葬奉而藏之人旅則陳之

獻古吹字竽音于牘音獨祗與隊同工才反

竽用竹爲之長四尺二寸形參差象鳥翼三十六管宮管在中央竅其管底之側以薄金葉障之吹則鼓之而出聲所謂篴也笙竽皆列管篴中施篴管端大笙十九管小者十三管篴以竹爲之長尺四寸八孔一孔上出各翹橫吹之小者尺二寸牘以竹大五寸長七尺短者一二尺其端有兩空髮畫以兩手築地應長六尺五寸其中有椎雅狀如漆篴而鼻口大二圍長五尺六寸以羊韋鞞之有兩紐疏畫御案埙簫管小師敎之聲



矇習之矣笙師又教之者人氣之器所用者廣凡有目  
無目皆兼習之笙入三終爲奏樂之一節故以有目者  
爲之而別使笙師教焉以矇矇不便錯雜於兩階也有  
時而笙有時而管故簫管諸器笙師兼教之矇應雅專  
爲藏樂之用藏夏上大夫亦用焉云教藏則九夏無不  
教矣鍾笙與鍾聲相應之笙厥作之也作之卽將藏之  
陳奉其所職之  
樂器陳於饌處

鍾師掌金奏之鼓凡祭祀鼓其金奏之樂饗食賓射亦如  
之軍大獻則鼓其愷樂凡軍之夜三鼙皆鼓之守鼙亦如  
之大喪厥其樂器奉而藏之

鼙音厲又  
七到反

鄭康成曰掌金奏之鼓主擊音鼓以奏其鐘鐃也祭祀  
饗食賓射亦然守鼙夜戒守鼓三鼙一夜三擊蓋守鼓  
不一鍾師特三擊以導之也御案鍾師所掌卽鼓人  
所教而別爲二職者鼓人所鼓神祀社祭鬼享軍旅田

役金奏以及祭祀百物之神皆用於鄉遂都邑故屬地  
官鐸師所鼓祭祀饗食賓客大獻皆用於王朝故屬禮  
官惟鼓鼗二職並列以其軍旅之所  
在而各共其職也廣其樂器鼓鐸也

銖師掌教銖樂祭祀則帥其屬而舞之大饗亦如之

銖東夷之樂四夷各有樂以銖名其官者周居西土東  
夷至遠明達夷皆屬也得遠人之懽心以祀先王大饗  
舞之以  
勸諸侯

旄人掌教舞散樂舞夷樂凡四方之以舞仕者屬焉凡祭  
祀賓客舞其燕樂

旄牛尾舞者所執以指揮也散樂列國之樂夷樂雜居  
中國夷狄之樂四方各善其鄉之樂者使仕而隸焉蓋  
舞與樂相通以周知四方之風  
俗也祭祀賓客舞之義如前

籥師掌教國子舞羽敝籥祭祀則鼓羽籥之舞賓客饗食

則亦如之大喪廐其樂器奉而藏之

敝同吹

舞有文武持羽吹籥所謂籥舞文舞也不言武純於文也鼓以鼓爲之節廐樂器亦以其所職之器

籥章掌土鼓豳籥中春晝擊土鼓敝豳詩以逆暑中秋夜

迎寒亦如之

籥章主吹籥以叶詩章者土鼓以瓦爲匡以革爲兩面可擊也豳籥以籥吹豳詩豳風言稼穡之事始於公劉周公後以戒成王因令民吹籥以相勸戒暑陰火盛而陽氣微寒陽氣盛而陰氣微極暑之日陰成陽功極寒之日陽爲陰主中春秋陰陽平均之時也而於此迎之蓋陽生者必待陰成陰生者必待陽成有變理之妙焉

凡國祈年於田祖歛幽雅擊土鼓以樂田畯國祭蜡則歛

幽頌擊土鼓以息老物

樂音洛

田祖先教民農者謂神農也田畯古之工於農者蜡歲十二月合聚萬物而索饗之也詳見郊特牲幽頌卽幽詩而以雅聲合之息老物物至此而老休息之以寓功成氣蓄之義故擊土鼓冬令閉藏實天地一元之氣蓄蓄而含養也

鞀鞀氏掌四夷之樂與其聲歌祭祀則歛而歌之燕亦如之

鞀鞀夷人所履之草屨也掌其樂因以之名官四夷四方之夷其種實繁中國第以夷蠻戎狄概之東方曰朝鮮方曰任西方曰侏離北方曰禁則其樂名人聲出於天籟雖異域不外故設官以統之而祭祀與燕亦歛而

歌之所以示太和被於四方使人知凡人皆同此心理所以教導化成之者不可不自盡也

典庸器掌藏樂器庸器及祭祀帥其屬而設筍虞陳庸器饗食賓射亦如之大喪厥筍虞

庸器先世所寶樂器若垂之離磬女媧之笙簧類又伐國所獲可寶之樂器及有功所鑄紀功之器皆傳爲世守者也設筍虞以陳庸器祭祀以告先人示能守饗食賓射以明前人之德筍虞方厥時縣之入墠弗用檀弓所謂有鍾磬而無筍虞也

司干掌舞器祭祀舞者既陳則授舞器既舞則受之賓饗亦如之大喪厥舞器及葬奉而藏之

干盾也舞者所執舞器則凡文舞武舞之器授舞者或親授或轉相授其受而藏之則歸於司干

大卜掌三兆之瀆一曰玉兆二曰瓦兆三曰原兆其經兆  
 之體皆百有二十其頌皆千有二百掌三易之瀆一曰連  
 山二曰歸藏三曰周易其經卦皆八其別皆六十有四掌  
 三夢之瀆一曰致夢二曰簡夢三曰咸陟其經運十其別  
 九十解居宜反又其宜反

天人一理也理極於精則人道即天道此惟聖人能然  
 下此則於義理不無是非故有疑則決諸神明龜服氣  
 而壽四靈之至靜者故藉以問神凡卜先以墨畫其事  
 於龜而火灼之以觀其兆三兆其大綱也玉如玉微有  
 紋瓦則其垢較粗原田也其垢大裂卜龜之法按五行  
 取象橫者土直者木斜曲者水團結者金散裂者火所  
 謂兆體也百有二十其頌千有二百蓋皆有成籍積而  
 斷之頌即繇詞今皆無傳洪範所謂曰雨曰霽曰蒙曰

繹左氏所載風皇于飛其鳴鏘鏘之類同一易也而三代序卦不同夏曰連山首長於方居東北於干爲丑於時爲亥成始而成終之義殷曰歸藏首坤於方爲中央於干爲未於時爲六月萬物生成於土之義周始乾坤文王所序天地萬物之父母也三代卜筮之法皆以易爲主而取象決疑用或不同夏殷之法不傳矣皆入謂三代皆以八卦爲經六十四卦爲別掌夢灋者人爲萬物之靈其精神可以無所不至雖寐中所見聞容有可占驗者但非深明陰陽之正理人道之精微則反信夢疑夢致生妖異故大卜掌其灋以決其是非鄭氏鏘曰致夢出於有所因孔子夢周公是也一仰一俯爲解解夢怪異趙簡子夢童子僕而轉以歌魯聲伯夢泣而珠盈懷是也無心感物謂之咸涉升也精神上與鬼神通經運及其別卽占夢之灋亦有成籍而大卜復參決之舊註以運爲燁非也

以邦事作龜之八命一曰征二曰象三曰與四曰謀五曰

果六曰至七曰雨八曰瘳以八命者贊三兆三易三夢之

占以觀國家之吉凶以詔救政

邦事國之大事待占者以人者爲概而問龜其筮與夢亦該其中矣征征伐之事象雲物災變凡有象者謀謀議是非不決者果理所必行而遲速輕重須酌者至問人物之至否雨問雨否瘳問疾瘳否贊相參助之意龜筮夢或專卜或參考皆以察事幾於未萌而致其戒慎善其修爲則警戒之意深而非禮之失寡故曰觀國家之吉凶且詔王救政也後世不明其義廢人事而專恃夢卜豈非僥乎

凡國大貞卜立君卜大封則眡高作龜大祭祀則眡高命

龜凡小事涖卜

卜言貞凡事必正而後卜也卜立君無冢嫡則擇其賢者而更卜請先君以決之大封封建諸侯卜其封域之



美惡祇龜骨之高處可灼者命龜將灼龜有命之之詞  
如祝祭祀與上二者皆大事大卜親之小事則泄之而  
已按儀禮卜人奠龜宗人視高及坐命龜而後卜人生  
作龜則命龜非灼龜蓋藉龜以問神必有詞以宣之即  
所謂命龜也

國大遷大師則貞龜凡旅陳龜凡喪事命龜

遷都出征則正龜於卜位不親命龜卜旅  
祭則但陳之而已喪事命龜者重喪禮也

卜師掌開龜之四兆一曰方兆二曰功兆三曰義兆四曰

弓兆凡卜事祇高揚火以作龜致其墨凡卜辨龜之上下

左右陰陽以投命龜者而契相之

相息亮反

劉氏彛曰將卜則開龜之下體去其外甲而存其下甲  
有橫直之文者以卜也其下甲有直文者所以分左右

則官恆解

卷王

春官

墨

陰陽也橫有五文分十二位者象五行與辰次也其上  
下不可以爲兆可開而燠者左右各二故曰四兆方一  
定之向功可成之業義當爲之事弓張弛之義揚猶熾  
也致其墨先以墨畫其所問之事於龜乃灼之龜之上  
下左右陰陽反覆視之以正其處授命龜者俟命之  
後再開而作之也契相彼此意見相合相爲贊助蓋恐  
一毫有誤致所占不靈慎重之意  
也不言命龜者選授卜師省文也

龜人掌六龜之屬各有名物天龜曰靈屬地龜曰繹屬東  
龜曰果屬西龜曰繭屬南龜曰獵屬北龜曰若屬各以其

方之色與其體辨之

果音贏繭同雷又力胃反

龜之類非一故須辨其名物物殊則名異靈歲久而通  
靈所謂神龜也釋次之亦有靈而可尋繹但不如天龜  
之至靈耳二者統下言言乎龜之美者以其得天地之  
靈氣故名之曰天龜地龜其實與下四龜皆產於地四

者之名亦以其大概言之也不可盡拘且四者之中卽時有天龜地龜也爾雅云俯者靈仰者釋前弁果後弁微左倪龜右倪若亦可辨之一端姑存之色五色體形體也

凡取龜用秋時攻龜用春時各以其物入于龜室上春釁龜祭祀先卜若有祭事則奉龜以往旅亦如之喪亦如之

御案取之用秋陰氣足也攻之用春劑之以陽也秋時已殺之至春攻治之則去其上甲而留其下甲及牆入藏之於室每歲易之惟失寶龜若天龜地龜則不易也按爾雅有十龜賈氏公彥曰一神龜龜之最神明者二靈龜今紫螭龜一名靈螭能鳴三攝龜腹甲曲折能自張閉好食蛇江東呼爲陵龜四寶龜五文龜甲有文采六筮龜常在著叢下潛伏七山龜入澤龜九水龜十火龜愚按龜之類不一海中者極大其他山林藪澤皆產之或靈或不靈亦不在形體之大小爾雅亦大概言之耳鱉龜殺牲以血之神之也先卜先代神於卜者鱉

時即祭之以新鑒旅  
非常祭而祈禱之名

蕤氏掌其燹契以待卜事凡卜以明火蕤燹遂飲其煖契

以授卜師遂役之

蕤時隨反蕤哉約反又祖堯反契苦計反蕤如悅反煖音俊又存問祖問二反

蕤荆木也之以之灼龜故因以名官灼龜取生荆枝及生堅木燒之存其炬以灼燹即炬也契刻也凡灼龜先以刀割所當灼之處燹契以火灼所契之處明火以陽燧取火於日也先以火蕤荆存性及灼時飲之使然以契柱燹火而授卜師役之使助之

占人掌占龜以八簪占人頌以八卦占簪之入故以眡吉

凶凡卜簪君占體大夫占色史占墨卜人占坼凡卜簪既

事則繫幣以比其命歲終則計其占之中否

簪同筮繫音係比毗志反

又必履反

中去聲

卜筮以求神神不可知也故卜筮必兼用以致其詳慎  
占人掌占龜蓋與卜師互參成之而大卜特總其事耳  
八頌卽大卜所掌人命卜而得其頌矣又以八筮占其  
頌再以八卦占入筮之故龜從筮從不外於義理而後  
吉凶可臆焉王氏昭禹曰龜卜之事龜坼而後墨見墨  
見而後色著色著而後體備卜人先占坼史占墨次之  
大夫占色又次之眾占備而後君占體以斷吉凶此尊  
卑之序也玉藻卜人定龜史定墨君定體則先後之序  
既事畢事也命將卜而先告神之詞於時卽有禮神之  
幣事畢則以所占之兆視與所祈之命相符否繫幣與  
命而藏之積歲計其占之中否以黜陟卜筮之人也

籒人掌三易以辨九籒之名一曰連山二曰歸藏三曰周

易九籒之名一曰巫更二曰巫咸三曰巫式四曰巫目五

曰巫易六曰巫比七曰巫祠八曰巫參九曰巫環以辨吉

凶凡國之大事先筮而後卜上春相筮凡國事共筮

巫如字易

當為易相去聲共上聲

三易之法即易辭以參考其義也九筮之名巫更巫咸等九人皆前代工於筮者其流傳各有法法異故名殊辨之而皆得其意義乃可以精於筮而辨吉凶也先筮後卜大事必慎重以決之也小事卜則不筮筮則不卜相筮選擇著草不曰擇而曰相敬重之辭共筮則並筮事而掌之

占夢掌其歲時觀天地之會辨陰陽之氣以日月星辰占

六夢之吉凶一曰正夢二曰噩夢三曰思夢四曰寤夢五

曰喜夢六曰懼夢

噩五各反

人在大地氣化之中其志慮精神當理與否時或形諸於夢第非深明義理者不能察其幾設占夢之官其亦必賢者爲之也天地之會天地氣化所際及陰陽消長之機皆是陰陽之氣所夢日時所值晦明風雨及諸變態日月星長乃謂日月望晦朔干支生王休囚及星辰躔度所值蓋以此數日爲主而合以夢決其有關係否非專信夢也正夢合理之夢噩夢驚愕致夢思夢專念成夢寤夢而寤言喜有所喜懼有所懼六者生於人心非清明在躬志氣如神則正夢寤矣決其是者明其非者使人去惡而遷善蓋卽所以爲教焉非如後世不修人道而聽命於夢也

季冬聘王夢獻吉夢于王王拜而受之乃舍萌于四方以

贈惡夢遂令始難毆疫

舍作釋難一作難乃多反

季冬萬物閉藏之時而有不常之夢故當問之聘問也以幣帛行禮而問吉夢卽王之夢問之而得吉則占其

故而獻於王若夢資良弼夢非熊羆皆默如有啟誘之者然故王拜而受之其惡夢則亦必陳諫勸以導王預防可知矣舍萌卽釋榮季冬榮始萌故云然四方東南西北各釋榮以禳之明警懼之意庶惡夢不驗也贈送也爲善卽避禍之方非專恃祈禳也遂令方相氏行難禮毆疫氣推亡以及人恐民或有裁厲也且難本舊典卽無惡夢斯時亦當行之經特連及之耳

眠祲掌十輝之瀦以觀妖祥辨吉凶一曰祲二曰象三曰

鑄四曰監五曰闇六曰瞽七曰彌八曰敘九曰隤十曰想

掌安宅敘降正歲則行事歲終則辨其事

輝音運鑄許規反又下規反瞽

忙鄧反隤子兮反弊必世反

祲陰陽之氣侵日而有異象也天變非一日象人君尤重故以眠祲名官而凡天變之象皆占之也輝日旁氣



殿陰陽沴氣侵日象雲物成象鑄雲如鑄而刺日監雲  
象籠日如監臨之間日月食嘗日月嘗嘗無光彌陰氣  
彌漫敘雲次敘如山而在日上隣虹氣凌日想雲日成  
形無可比而想其義以決之安宅安民居敘降鄭康成  
曰敘次其凶禍所下謂釐移之蓋天變不虛生安民居  
而釐移其禍人君不以災變爲一人累而恐其妨民也  
正歲行其事更新之意歲終斷其事察災變之弭否

大祝掌六祝之辭以事鬼神元祈福祥求永貞一曰順祝

二曰年祝三曰吉祝四曰化祝五曰瑞祝六曰筴祝

祝告神之詞大祝祝官之長神處於幽而其理實與人  
無二人失其常則理氣乃不能與神通凡祭祀皆以敬  
神而敬之之故則恐人道不修致天之罰求神宥之也  
故必有祝詞以達之永貞永守其正人倫日用順其正  
理而行之各得其宜無意外之患苦卽所謂福祥也祈  
福祥求永貞如君明臣良父慈子孝之數各得其理而

成其太和也順祝順理而祝如祭天地宗廟及凡常祭  
順其道而致敬於神年祝祈年吉祝有吉慶之事而禮  
神化祝有災異而祈其消化瑞祝有祥瑞不敢信以為  
實而歸功於神明災祝有大事祝神而存諸筮以待後  
驗夫天人感應捷於影響順理則吉違理則凶非可以  
祝求也而聖人設官為之者蓋心之邪正人不及窺而  
神天察之祭事非徒文也其必有順天理踐人道之實  
而後可以事神祝詞且不可苟况平日之言動乎此亦  
天人合一之旨矣

掌六所以同鬼神元一曰類二曰造三曰禘四曰禋五曰

攻六曰說

造七報反禘古外反又音會禋音詠說書悅反

大神地祇人鬼非一方域異則鬼神亦殊六祈有所祈  
而祭之莫測鬼神之變化所在而以誠敬求之所以為  
同也類非常祭而類其儀造至於其地而祭禘眾期會  
以共祭若大宗伯以禘禮哀國收之類禋水旱瀉疫或

風雨不時祭山川之神政祈神禦災如妖邪蠱毒之類  
必藉神以去之詩曰秉彼炎火是其一也說解說之義  
或愚民無知觸犯鬼神悔罪自新以祈  
免也此六祈皆有祝辭與上文互相備

作六辭以通上下親疏遠近一曰祠二曰命三曰誥四曰

會五曰禱六曰誅

會如誅字

上下謂天地親祖考疏古昔聖賢近社稷五祀遠四海  
九州之神御案六祝之辭典祀所常用此六辭因事  
而特告也祠廟也告廟之辭命如命龜之命記曰假爾  
泰龜有常假爾泰筮有常是所以命之也誥告如武城  
告于皇天后土金縢乃告太王王季文王會合眾而要  
言於神春秋傳司慎司盟召山名川羣神羣祀先王先  
公七姓十二國之祖明神殛之亦其一類禱禱於天地  
社稷宗廟若崩賸戰于鐵禱神是誅據生時德行以錫  
命之

辨六號一曰神號二曰鬼號三曰元號四曰牲號五曰齎

號六曰幣號

鄭康成曰號謂尊其名更爲美稱焉神號若云皇天上  
帝鬼號若云皇祖伯某元號若云后土地元幣號若玉  
云嘉玉幣云量幣鄭氏眾曰牲號犧牲名號若牛曰  
一元大武之類齎號黍稷名號若黍曰薌合之類

辨九祭一曰命祭二曰衍祭三曰炮祭四曰周祭五曰振

祭六曰桴祭七曰絕祭八曰繚祭九曰其祭

衍讀作延炮  
讀作包桴如

泉反繚音  
了其供同

古人每食必祭有此九者命祭玉藻君賜之食而君客  
之則命之祭然後祭是也衍讀爲延曲禮客若降等執  
食與辭主人與辭於客然後客坐主人延客祭是也  
御案男巫望衍旁招以茅則延可爲衍炮讀爲包包猶

兼也有司徹宰夫贊者取白黑以授尸尸受兼祭於豆  
祭是也御案間傳輕者包重者特周徧也曲禮殺之  
序徧祭之擣祭以肝肺菹擣鹽醢中以祭振舉動也不  
食者擣而不振將食者必振乃祭絕祭繚祭皆祭肺也  
但肺有二種曰舉肺祭肺祭肺則已絕者直祭之而已  
舉肺則少儀所云三牲之肺離而不提心必繚而絕之  
乃可以祭其猶授也王祭食宰夫授祭愚按食必祭不  
忘本也但其禮簡畧或隣於褻有此九法乃致其恭敬  
周詳之意

辨九擗一曰詣首二曰頓首三曰空首四曰振動五曰吉  
擗六曰凶擗七曰奇擗八曰褒擗九曰肅擗以享右祭祀

擗古拜字詣音啟本又作稽  
奇居宜反褒音報右讀爲侑

御案古人之拱兩手不平故有尙左尙右之異凡別  
拜尙左手女拜尙右手拜者下一手先至地而上一手

後至乃交喪拜則男子尚右手婦人尚左手稽首頭至地稽留片時而後起頓首頭至地則舉一謂之叩首如以首叩地也空首先以兩手拱至地頭至手以頭不至地故名空首振動肅拜但俯下手鄭康成曰若今時擡賈氏謂推手曰揖引手曰擡此四拜者正拜也餘五拜逐事生名耳吉拜稽首頓首男尚左女尚右凶拜則男尚右手婦尚左手稽顙也稽顙類稽首而顙亦至地且久後世所謂泥首也奇拜一拜也喪拜再拜也此九者不專爲享右祭祀而結以是者舉其重者而言享獻也謂朝獻饋獻右讀爲侑侑勸尸食而拜

凡大禋祀肆享祭元則執明水火而號祝隋轂逆牲逆尸

令鍾鼓右亦如之來瞽令皋舞相尸禮既祭令徹

隋許規反皋讀

作噪尸高反又尸

報反相息亮反

大禋祭天神肆享祭宗廟元地元陽燧取火於日方諸取水於月藉天地之氣以給蒸享號祝舉神元之號以

祝也隋隋祭凡血祭曰饗右讀爲侑令鍾鼓令樂師帥其屬奏鍾鼓也來瞽令瞽人來令令樂師皋告也告當舞者舞相尸禮延其出人詔其坐作徹徹祭器

大喪始崩以肆鬯潁尸相飯贊斂徹奠言甸人讀禱付練

祥掌國事國有大故天裁彌祀社稷禱祠

潁綿里反相息亮反飯扶晚反斂

力驗反  
付音附

肆鬯陳尸設鬯也潁尸以鬯浴尸潁尸小宗伯亦掌之治其禮也此則親其事也浴訖即飯含不言相含者大宰贊贈玉含玉也贊斂者冬官主斂事大祝贊之徹奠徹而又奠也自始死之奠以及襲奠小斂大斂奠並朝夕之奠皆徹前奠而後陳新奠言猶語也甸人喪事代王受胄災大祝爲禱辭語之使以禱於藉田之神附虞卒哭後耐祭於祖廟將以新主耐廟而預告於先王也練十三月小祥練祭祥二十五月大祥除衰杖大故兵

寇天裁疫癘水旱彌猶徧也徧祀社稷及諸所禱既則祠之以報焉

大師宜于社造于祖設軍社類上帝國將有事于四望及軍歸獻于社則前祝

宜造類皆祭名將出師告於社與祖設社主取遷廟之主載以行類祭上帝蓋王者之師皆不得已而用故告帝告祖祭社此三者皆君舉而祝從至將有事於四望及軍歸則君不親行故祝前行以致告

大會同造于廟宜于社過大山川則用事焉及行舍奠建邦國先告后土用牲幣禁督逆祀命者頒祭號于邦國都

鄙舍讀作釋又一音敎

大會同王合諸侯於國外用事用祭事以告行及則舍奠蓋出告反面事死如生事神如事人也后土社神牲



略禮物不虛也督正也禁其所不當祀正其所當祀者  
逆祀命命之祀而弗祀非所命而祀者皆是祭號其所  
富祭之神號邦國都鄙土地人民廣狹  
不同名位亦異故必頒其號而後不妄

小祝掌小祭祀將事侯禴禱祠之祝號以祈福祥順豐年

逆時雨寧風旱彌裁兵遠臯疾大祭祀逆蠶盛送逆尸沃

尸盥贊隋凡事佐大祝彌讀作救綿以反遠於願反

將事將號祝之事如下文也侯之言侯也於當禴禱祠  
時爲其祝號以候禴禱邪凶咎求佑曰禱報賽曰祠豐  
穰之後仍祈有年曰順彌邪同息也逆蠶盛蓋已熟而  
實於簋簋者若小宗伯所逆則未炊之盥舍人實而陳  
於西堂之上小祝自堂下逆而升之尸在廟門外則疑  
於臣在廟中則全於君君在廟門外則疑於君入廟門  
則全於臣全於子故君迎牲而不迎尸送尸逆尸大小  
祝主之大祝事多或有不暇故小祝共之沃尸盥者尸

尊不就洗尸入廟門盥於盤小祝沃水也隋祭者尸始入室拜妥尸尸隋祭以韭菹播於醑祭於豆間小祝贊之賈氏公彦曰佐大祝不於職末言之者自此以上佐大祝自此以下惟贊與佐大祝設熬以下小祝專行

大喪贊與贊徹贊奠設熬置銘及葬設道齋之奠分禱五

祀大師掌豐祈號祝有寇戎之事則係郊祀于社凡外內

小祭祀小喪紀小會同小軍旅掌事焉

彌音咨贊徹贊奠四字錯簡今正補

此於

沐浴尸於棺既蓋設於其旁所以惑蚍蜉熬黍稷稻粱盛於筐或加魚腊銘明旌也書死者名於旌極弓以死者為不可別已故以其旗識之道齋生人行道必有齋故葬時設道齋之奠分禱五祀以告行也魯鼓保郊於郊外事祖神以係固郊圻外小祀林澤四方百物內小祀宮中七祀等小喪紀王后以下之喪小會同殷頑

之類王不與則為小小軍旅  
造剡大夫征伐事號祝之事

喪祝掌大喪勸防之事及辟合啟及朝御匱乃奠及祖飾

棺乃載遂御及葬御匱出官乃代及壙說載除飾小喪亦

如之防扶方反辟音關朝直通反匱古樞字說吐活反

喪祝從所重而名也勸防執轡居匱路前詔告以防傾側辟除所重而名也辟除啟喪而行喪祝號詔之朝啟行朝於祖廟喪祝為御匱奠奠祖廟祖祭追於庭也生時出必祖死亦象之事死如生也飾棺載喪匱祝乃御匱以行乃代表祝二人相與更也及壙及將入壙時說載脫去車與棺引等除飾解去帷荒池祖等小喪王后世子以下及其禮皆同此喪紀之事特即天子言之而自王以下及於士庶其制雖有等差其禮不易所用之物亦多相類所以教民重本合禮經所載可知不能盡述也

掌喪祭祝號王弔則與巫前掌勝國邑之社稷之祝號以

祭祀禱祠焉凡卿大夫之喪掌事而斂飾棺焉

喪祭虞也君尊弔臣喪祝與巫以挑蒯執戈在王前辟除不祥勝國已亡之國其社帛而國與邑民或有所禱而獲應則其禱其祠皆為之祝號按士喪禮有商祝夏祝周祝之名士而有之則卿大夫可知而其人皆喪祝統之非喪祝在在而親其事也祝必有禮聽於喪祝乃無失耳

甸祝掌四時之田表貉之祝號舍奠于祖廟禰亦如之師

甸致禽于虞中乃屬禽及郊饁獸舍奠于祖禰乃斂禽禰

牲禰馬皆掌其祝號甸音田貉讀作禰莫駕反舍音釋屬音燭饁于敏反禰音誅

四時之田蒐苗獮狩也貉禰同田以習武故亦禰祭表植旌為表也植表與禰皆有祝號甸祝為之或田或征

伐皆釋奠于祖廟。廟，父廟也。其祝號亦爲之師。句起大  
眾而出虞中，卽立表處獵者，各以其禽來此，屬別其物。  
饋饋也。四郊皆有羣神之兆，以所獲禽饋，刻使薦於羣  
兆也。奠于祖廟，告事畢，斂禽，每禽擇取三十一爲乾豆。  
二爲賓客，三爲充君之庖，斂之不特入于腊人，入于罔  
人，服不氏以待不時而取，皆是禴禴也。禴，牲求肥充禴  
肥健。

詛祝掌盟詛類造攻說禴禴之祝號作盟詛之載辭以叙

國之信用以質邦國之劑信

詛阻豫反造說音義見大祝

鄭氏鐸曰：小人之情，有不畏刑罰而畏鬼神者，故爲詛  
盟之法，以待之。盟，盟其將來詛舉其往，過以盟於神，毋  
再犯也。類，造皆兵祭，以所伐國之罪昭告大神，與同役  
者要言，俾一心用命。如春秋傳所載，墜命亡氏陪其國  
家之類，義近於詛。攻說禴禴，義見大祝。大祝祈而不掌  
祝號，詛祝掌之。秋官司盟，掌盟載之法，亦不掌祝號。盟

詛之載辭亦詛祝作之叙序其事之大小信用以誠信用事要於神以成之質正也成也劑兩相質信之辭

司巫掌羣巫之政令若國大旱則帥巫而舞雩國有大災

則帥巫而造巫恆

造七報反

政令選擇其賢否及降神祈禱等事雩吁嗟以求雨也建午之月雩祀上帝者禮之正大旱而雩非常故雩羣巫而舞天子於上帝諸侯於上公之神若句龍柱東等巫恆前代之工於巫者造而求之使其應速

祭祀則其隕主及道布及菽館凡祭祀守瘞凡喪事掌

降之禮

隕音丹菽子都反瘞於例反

隕館皆器名木主盛於隕茅菽盛於館道有以布爲席位神者也其之候大祝取土及菹則以器退瘞埋至幣守者人待之辭瘞而後去也巫降藉巫以降神掌其禮

男巫掌望祀望衍授號旁招以茅冬堂贈無方無算春招

弭以除疾病王弔則與祝前

衍音延

望祀遙望而祭望延延望而延其神授號授以祭祀之名號旁招四方招之以茅取其潔冬堂贈者於堂賽神迎新送舊禮贈之也無方無定方無算幣帛無定數春則招迎新福弭其災患以除民之疾病蓋盈天地間莫非陰陽二氣即莫不有鬼神聖人慮二氣之或為殃而鬼神憑之以禍民故有如是之禮凡此皆所以致敬愼合天人也

女巫掌歲時祓除蠶浴旱暵則舞雩若王后弔則與祝前

凡邦之大裁歌哭而請

鄭康成曰祓除如今三月上巳脩禊之類蠶浴以香薰草藥沐浴旱祭崇陰故使女巫舞歌哭而請冀以悲哀

感神靈也按天子爲人神之主果其修身立德敬天愛民自然陰陽和而災癘息然聖人不謂己德果修天心果可必也是以有此等之禮而亦使民人咸畏天命慎言行以邀天眷所以爲承天化民之實政非崇尚渺冥也後儒不察乃欲掃而空之其尙爲知天知人者乎

大史掌建邦之六典以逆邦國之治掌灋以逆官府之治掌則以逆都鄙之治凡辨灋者攷焉不信者刑之凡邦國都鄙及萬民之有約劑者藏焉以貳六官

劉津私反

大史史官之長典則皆法也逆受也受而鈎考之六典八法八則皆冢宰所建而大史亦建焉者其籍皆隸於大史大史掌之其得失亦得而攷覈之不特此也凡邦國都鄙及萬民之有約劑者皆藏焉六官所治其籍咸大史掌之蓋古以方策爲籍非若後世藏書之易朝廷典則至重悉掌於大史乃免淆失故云建云逆云貳焉



六官之所登若約劑亂則辟瀆不信者刑之

辟旁亦反

又言六官之所登及凡約劑亂則攷察其失以致之於瀆瀆謂詔王而責之也其六官所登及凡約劑有與所掌不符或初是而終背之者則刑之亦詔於王而罪之也

正歲年以序事頒之于官府及都鄙頒告朔于邦國閏月

詔王居門終月

歲年皆市十二月之名也而微有分一年二十四氣如立春正月節雨水正月中氣節氣有人前月法中氣無入前月法節氣而則為一年中氣而則為一歲中朔大小不齊則置閏正歲年者齊其度數分刻及置閏頒行天下使知一年所當行之事以十二月頒于諸侯諸侯受而藏之祖廟每月朔則以特羊告廟請而行之門路寢門也天子十二月各隨時而異其所居月令青陽明堂總章元堂左右个是也閏月無所居故居於門

大祭祀與執事卜日戒及宿之日與羣執事讀禮書而協  
事祭之日執書以次位常辨事者攷焉不信者誅之大會  
同朝覲以書協禮事及將幣之日執書以詔王大師抱天  
時與大師同車大遷國抱瀋以前大喪執瀋以泣勸防遣  
之日讀誄凡喪事攷焉小喪賜諡凡射事飾中舍算執其

禮事

與大師之大音泰  
遣棄戰反舍音釋

執事大卜之屬與占人職史視墨是也戒散齊七日宿  
致齊三日讀禮書而協恐有失錯也書若今儀注次位  
常次其所位之常辨臨時爭辨攷其得失不信不如  
法而妄爭辨也誅罰之以書協禮事先以書協其事免  
臨時失錯將送也詔王亦免失禮大師出兵也天時占  
候之書大師瞽師占候必參以音律故同車瀋司空營

國之法先王有成籍抱之以前使遵而營造大喪之法  
六引六紼之類泄之以免淆亂遺柩將行而奠於祖庭  
誄稱其生前之行以告今日諡法所由蓋大師作諡大  
史共其事必讀於柩者一則質諸死者而無憾一則示  
生時所行死而不可掩使人知勸戒也攷攷其得失小  
喪卿大夫賜諡亦與大師共其事中所以盛算也飾治  
之使潔設算於中以待射時取之中  
則釋之禮事射時之升降威儀皆是

小史掌邦國之志奠繫世辨昭穆若有事則詔王之忌諱

奠如字繫

戶計反

邦國之志四方地志父子相代謂之世世之所自出謂  
之繫奠定也所出之繫與其廟祧昭穆久而或紊故記  
之有事有事於祭告  
死日爲忌名爲諱

大祭祀讀禮灋史以書敘昭穆之俎簋大喪大賓客大會

同大軍旅佐大史凡國事之用禮瀆者掌其小事卿大夫之喪賜諡讀誄

大祭祀祭宗廟大史與羣執事讀禮瀆而主讀者小史也於大史曰禮書以書協事此曰禮法則事與書兼之矣史小史之屬大喪等事及凡事用禮法者掌其小事以佐大史賜諡讀誄大史成之小史讀之也

馮相氏掌十有二歲十有二月十有二辰十有二十有八

星之位辨其敘事以會天位

馮音憑相息亮反

歲太歲也在天有歲星在地有太歲歲星右行太歲左行每歲移一舍十二年而一周天爲一紀月斗柄所建之月每月移一舍十二月而一周爲一歲辰十二地支子丑寅卯等是日十天干甲乙丙丁等是二十八星角亢氏房等是指星體而言謂之星日月會於其星卽名宿十二辰亦名次天運以日月爲綱而星辰次舍亦必各

安其常始無災沴焉相氏詳察其位以定歲時辨其敘  
事如春平秩東作等類民時次序而理也會合也陰陽  
五行悉如天道之常則合天位而  
凡天子治理必準乎天亦可知矣

### 冬夏致日春秋致月以辨四時之敘

致虞書敬致之義天道有常非人所能強致也候日月  
之行度順天時而修人事即爲敬致之如致之然也致  
日月者日行赤道月行黃道黃道北至東井南至牽牛  
東至角西至婁夏至日在東井而北近極星則暑短表  
景尺五寸冬至日在牽牛而南遠極星則暑長表景丈  
三尺春分日在婁秋分日在角而中於極星則暑長短  
中表景七尺三寸月之九行在東西南北有青白赤黑  
道各二而出於黃道之旁立春春分月東循青道而春  
分上弦在東井立秋秋分月西循白道而秋分上弦在  
牽牛立冬冬至北旋黑道立夏夏至南徙赤道冬夏二  
至日極長極短以此時測日之盈虛春秋二分當黃赤  
二道之交以此時測月之弦望得陰陽之真度而氣之

至不至  
可知矣

係章氏掌天星以志星辰日月之變動以觀天下之遷辨

其吉凶

天星兼經星緯星而言金木水火土五緯星五行之真氣三垣二十八宿皆經星萬物之精氣所呈人事失其正而星象變動係章氏占之以告於王而修政刑易風俗也遷不守常道如遷易也吉凶由人人人事與天道相準五行敘而百度貞乃趨吉避凶之道也兼言日月者占候必參之

以星土辨九州之地所封封域皆有分星以觀妖祥以十有二歲之相觀天下之妖祥以五雲之物辨吉凶水旱降豐荒之祲象以十有二風察天地之和命乖別之妖祥凡

此五物者以詔救政訪序事

分奉運反  
相息亮反

星土上為星辰下為土石  
外皆屬焉此云九州第以  
星所屬之地而即星象之  
載其一端也第必以中夏  
也十二年一周天歲星光  
黃而沈其野大穰故以其  
黑或為物或傍日月而為  
於下而其象始見於上吉  
風十二月八方之風如常  
之風主兩月東北曰條風  
西北曰不周風也東方曰  
風北曰廣莫風也風者天  
察之命名言之也不和為  
干陰陽之正氣而始有乖  
也星也雲也風也詔上以  
訪於下以求朝廷過舉政  
上所以治下之事事下所

修己之務

內史掌王之八枋之灋以詔王治一曰爵二曰祿三曰廢  
四曰置五曰殺六曰生七曰予八曰奪執國灋及國令之  
貳以攷政事以逆會計掌敘事之灋受納訪以詔王聽治

枋本又作柄邦命反  
治直吏反會古外反

此所掌八柄與大宰同而次第各異者大宰職先吉而  
後凶此則各以兩者相對爲次第也八柄制於王而掌  
於內史大宰奉王命以行之其有不合者內史得而駁  
正之也國法六典八法八則法者一時之法合者一時  
之令內史皆執其貳與大宰司會相參稽不曰敘事而  
曰敘事法者所納訪之事有大小緩急隨事斟酌次第  
發命無一定之敘凡事之有定者則直言敘事納言於  
上訪訪於下蓋內史所掌多一定成法而納訪則隨時



增損此以見聖人合天下之聰明以爲聰明也

凡命諸侯及孤卿大夫則策命之凡四方之事書內史讀之王制祿則贊爲之以方出之賞賜亦如之內史掌書王命遂貳之

策命簡策書王命事書所掌於王之事與書讀讀以示王也贊贊司祿也爲之爲之辭方版也賞賜或賞地或好賜賜予皆是貳之書王命而藏其副本覆舉內史明親其事而不屬之他人也

外史掌書外令掌四方之志掌三皇五帝之書掌達書名於四方若以書使于四方則書其令使所吏反

外令頒王命於各國四方之志四方里域政治風俗藝之以備顧問三皇五帝之書蓋三墳五典之類或疑舊

三  
三  
三  
頡始造文字三皇無書不知王者治世豈能無字特簡  
畧不備著頡始廣之而便民用耳省名即文字達於四  
方使同文也使命不必皆有書若有書者則書之也

御史掌邦國都鄙及萬民之治令以贊冢宰凡治者受灋

令焉掌贊書凡數從政者

數所主反

御侍也侍君左右之史邦國都鄙萬民之治令皆冢宰  
掌之而後以御史贊之恐有偏缺補察之也受法令者  
法令出於王由御史授冢宰而下若王之法令不合則  
得而封還之也贊書王頒法令贊其辭若今作詔文也  
凡總數計之數小數計之從  
政者之名皆掌於御史也

車掌公車之政令辨其用與其旗物而等敘之以治其

出入

巾衣也五路皆飾之如衣故官名巾車公猶官也用祀與賓之屬旗物大常以下等敘等其上下敘其先後

王之五路一曰玉路錫樊纓十有再就建大常十有二旂以祀金路鉤樊纓九就建大旂以賓同姓以封象路朱樊纓七就建大赤以朝異姓以封革路龍勒條纓五就建大白以卽戎以封四衛木路前樊鵠纓建大麾以田以封蕃

國錫音陽樊步下反旂音流一音游龍如字又音龐條作條他刀反

路大也以其屬王故以大爲名玉較式之兩端飾以玉金象皆然錫在馬額盧刻金爲之所謂鑲錫也樊馬帶纓馬鞅皆以五采剡飾之十有二匝大常見司常職旗常可以通稱惟天子畫三辰稱大常旂旂旗之末垂者亦十有二也鉤馬當胸亦以金爲之大旂畫九龍以會賓客封同姓亦賜金路朱象路無鉤以朱飾勒而已大

赤旗名朝視朝革路輓以革而漆之無五金象之飾龍  
勒以龍文飾馬鞅條纓以條絲飾革纓大白亦旗名即  
戎兵事四衛四方諸  
侯守衛者蠻服以內

王后之五路重翟錫面朱總厭翟勒面績總安車彫面鷩

總皆有容蓋翟車貝面組總有握蓋車組輓有翟羽蓋直

龍反錫音陽厭奄接反總作孔反績

戶對反鷩烏兮反握音屋輓音晚

重翟兩旁以翟羽為蔽皆二重后從王祭祀所乘錫面

如王路之錫飾於當面朱總馬勒而飾以朱也厭翟相

次以翟而厭其木后從王饗賓所乘者勒而如王革路

之龍勒飾於當面績總繪馬勒以文安車坐乘之車無

飾后朝王所乘者彫面彫面不蓋龍文鷩青黑色以鷩

色之給為馬勒而已容車帷蓋車蓋翟車后所乘以桑

者不重不厭惟以翟羽飾車之兩旁貝面以貝飾勒之

當而其總則不以給而以條其上則有幄而無蓋輦車

后宮從容所乘但漆之而無飾人以粗輓之而行嬰大扇以禦風塵羽蓋卽繖所以翳日皆人執之而傍車以行以上皆后之五路言翟言車而不言路者遜王也

王之喪車五乘木車蒲蔽犬褊尾囊疏飾小服皆疏素車  
焚蔽犬褊素飾小服皆素藻車藻蔽鹿淺褊革飾駢車韁  
蔽然褊髮飾漆車蒲蔽豸褊雀飾

喪車五乘始遭喪所乘木車木車不漆者蔽以蒲爲蔽犬褊以犬皮爲衣又以犬尾爲弋戟之破疏飾粗褊與素二物皆粗布爲之緣服讀爲簞刀劍短兵之衣皆以粗布爲之素車卒哭所乘以白土堊車焚讀爲蕝以蕝爲蔽其褊服以素繪爲緣藻車旣練所乘藻水草蒼色以蒼土堊車蔽以水草以鹿爲褊取夏時之鹿之淺毛爲褊服又以鹿革爲緣駢車大祥所乘少加漆飾不全漆韉細葦席漆之以爲蔽然果然獸名也以果然之皮

爲禠髮赤多黑少之色以髮色之章爲飾漆車禠所乘  
藩蔽漆以爲蔽軒胡犬以其皮爲禠雀黑多赤少以是  
色之章爲飾按此五車皆爲惡車以其無文飾又云喪  
車無等謂皆惡車而已非謂卑者竟得上同於尊者先  
儒多  
說

服車五乘孤乘夏篆卿乘夏縵大夫乘墨車士乘棧車庶  
人乘役車凡良車散車不在等者其用無常凡車之出人  
歲終則會之凡賜闕之毀拆入齋于職幣

服車服事者之車言孤而不言三公者三公尊不常服  
事如或服事亦同孤之車也夏篆以五色刻畫轂約夏  
縵但畫五采而不彫刻墨則漆以墨色而不畫棧則草  
車並不漆也役車有方箱可載任器以供役精製曰良  
粗製曰散不在五車之等則惟人所用于出給官用入  
用畢而歸官會計其出入之數闕凡賜人者則不會矣

若車無故而毀拆則罰之使  
入其資於職幣以戒不謹

大喪飾遣車遂厥之行之及葬執蓋從車持旌及墓噤啓

關陳車小喪共匱路與其飾歲時更續其其弊車大祭祀

鳴鈴以應雞人

遺溪現反  
噤音呼

遣車一日鸞車厥陳也行舉以如墓也從車柩車生時  
車建旌雨則有蓋今柩車無蓋執而隨之持旌前導以  
象生也闕墓門車貳車噤之使啟使陳小喪羣王子三  
夫人以下匱路載柩之車飾棺飾亦巾車共之更續易  
其舊而以新者續之其弊車則共於車人材或有可  
用也雞人呼旦巾車鳴鈴以和之所以警王風興

典路掌王及后之五路辨其名物與其用說若有大祭祀  
則出路贊駕說大喪大賓客亦如之凡會同軍旅弔于四

方以路從

說吐活反  
一書銳反

巾車通掌車政典路第掌五路之名物用說故分二職  
用駕之說舍之也贊僕與趣馬也亦如之亦出與贊也  
王出不常路乘一路  
典路必以其餘路從

車僕掌戎路之萃廣車之萃闕車之萃萃車之萃輕車之

萃凡師共萃車各以其萃會同亦如之

萃七內反廣古曠  
反萃泊清反輕溪

政反

萃副貳之名五路皆有貳數不過十二戎事危故副貳  
尤眾戎路王在軍所乘廣車橫陳之車闕車王在軍門  
亦象闕列車為障萃車即駟車對敵自隱蔽之車輕車  
用以馳敵致師之車先儒謂闕車補闕之車然五路皆  
有萃即所以補闕也又言凡師共萃車明軍中金車  
象車不乘也各以其萃凡軍車皆有萃會同亦然



大喪庶草車大射共三之

大喪遺車九乘陳草車五而金玉象木而九矣舉草車以該之乏一名容所以蔽矢鄭氏樵曰文反正爲乏正以受矢乏以蔽矢大射王射也

司常掌九旗之物名各有屬以待國事日月爲常交龍爲旂通帛爲旟雜帛爲物熊虎爲旗鳥隼爲旟龜蛇爲旐全羽爲旞析羽爲旛

旛旂常通名也官名司常舉旛之尊者以識之物通帛雜帛之屬名旂常旟物之屬通帛大赤色周所向無他飾雜帛以素帛飾其側全羽析羽皆五采繫之於旛旛之上所謂注旛於干首也大常以下其檣首皆有旛羽

及國之大閱贊司馬頒旗物王建大常諸侯建旂孤卿建

旛大夫士建物師都建旗州里建旛縣鄙建旛道車載旛  
旛車載旛皆畫其象焉官府各象其事州里各象其名家  
各象其號凡祭祀各建其旗會同賓客亦如之置旛門

仲冬教大閱時田之極盛者故舉以明概大常畫日月  
星辰象王者之名如日月星辰之常照也旛畫交龍一  
升一降象上從君而下澤民也旛無畫赤者周之正色  
不雜以他色尊王也孤卿奉王命而行不自專也物飾  
以殷之白色周承殷而酌定禮樂象大夫士承上而參  
酌謀議也師都六鄉六遂之眾及其長建熊虎之旗以  
示威州里州長鳥隼迅擊象州里承上及下迅速也縣  
鄙位卑第守法治民故建旛象龜蛇之靜鎮道路道中  
所乘先儒以爲象路旛車燕閑所乘載旛載旛皆取五  
色文明之象御案各象其事如孤卿同建旛大夫士  
同建物而別書其旗曰某司徒之旛某司空之旛大夫  
某官士某官之物也各象其名如州里之吏同建旛則

書某州之旗某里之旗也家各象其號如魯三家同建旗則書季孫氏之旗孟孫氏之旗也置旌門置旌於門以爲營衛

大喪其銘旌建厥車之旌及葬亦如之凡軍事建旌旗及致民置旗弊之甸亦如之凡射共獲旌歲時共更旌

鄭康成曰銘旌王則大常也士喪禮爲銘各以其物葬云建之則行時解脫之大司馬致眾之時司常置旌旗民至則仆之誅後至者置樹旌於地也獲旌獲者所持旌更旌易舊予新

都宗人掌都祭祀之禮凡都祭祀致福于國正都禮與其服若有寇戎之事則保羣神之壝國有大故則令禱祠既祭反命于國

周官解

卷三

春官

齋

都王子弟所居之邑其地或有山川及因國之在其地而無主後者都宗人掌其禮既祭致福于國不敢自私也都禮與其服有違越者得督之保羣神之譴恐有陵犯也國有大故徧禱羣神則都亦禱祀反命于王焉

宗人掌家祭祀之禮凡祭祀致福國有大故則令禱祠反命祭亦如之掌家禮與其衣服官室車旗之禁令

家大夫采地其所祀與都同正其禮制亦同

凡以神仕者掌三辰之灋以猶鬼神元之居辨其名物以冬日至致天神人鬼以夏至致地祇物彪以禱國之凶荒民之札喪

彪有祕反禱胡對反凡則八反

鄭案卜史祝巫宗人諸職皆有事於神此以神仕者則未受官而學藝以待用者猶圖也三辰日月星也天

地之精所聚其氣分散於萬物而有鬼神明乎三辰之  
象以求鬼神元之所在其物可定其名可識矣冬至陽  
生神至此而益伸人亦天也全乎天之理而爲人則必  
得乎天之眷而爲神故言致天神人鬼於此時夏至陰  
生鬼至此而益壯地元陰也物變則藉陰氣以肆虐者  
故以此時致之致者考其興衰隱見而使民修德以正  
之禴除也凶荒札喪雖由陰陽鬼神而致皆人心不正  
上千天和故惟修德可除也鄒康成曰國語古者民之  
精爽不攜貳者而又能齊肅中正其知能上下比義其  
聖能光遠宣明其明能光照之其聰能聽徹之如是則  
神明降之在男曰現在女曰巫是以使制神之處位次  
主而爲之牲器時服巫既知神如此又能居以天法是  
以聖人用之今之巫祝既開其義何明之見何法之行  
正神不降惑於淫厲苟貪貨食遂誣人神令此道誠痛  
矣

## 總論

御案職掌邦禮而以祭祀爲主蓋所以治神人而和上下  
故凡有事於禮及司神之官皆屬焉愚按天人無二理  
也天蒼蒼不可知而其理全在於人人道所在皆有天  
理循天理而行審於幾微久之卽念念無非天理則天  
道在我故孔子曰知我其天而天且不違也後世禮樂  
不興人旣無以檢束其身心而又以天道爲高遠神明  
爲恍惚於是縱情蔑理無所不爲豈知悖天理而干罪  
殃自天子至於庶人心不正身不修而能倖免者蓋亦  
寡矣大宗伯所掌雖多祭祀巫祝之屬而其平日禮樂

明備所以導民於中正者已詳然後人知人道卽天道而敬鬼神省罪咎所謂非禮祈禱之事亦又免矣世或不信鬼神而縱情妄爲或不修實德而專事祈禱聰明者既失之狂肆愚昧者又誤入於邪僻雖師儒之教不明亦在上者有以使之若秦皇漢武侈妄想於神仙梁武道宗專求福於齋醮彼既不知正心修身仁育義正爲天人相孚之本而歷代愚民爲聞香爲白蓮種種邪教煽惑爲奸上之人既知其爲非矣而不知其原由於大學之道不明也孟子曰經正則庶民興庶民興斯無

邪惡夫經者豈非三綱五常敦倫盡性之實乎五倫本於五性五性原止一性盡其性而盡人物之性禮樂刑賞悉在其中矣爲民牧者何不深思之而力行之至近世官吏素不能體上意以安民及民怨畔滋事則加以邪教之名期於免罪當寧或不察之亦以爲果邪教矣覺民性無常平日敎化皆不能爲功豈不惑歟